

CÁTEI LÉ BURI MEJA JADÜGÜBEI APÓSTOLUGU

Louñajani Búngiu Sífiri Sándu

¹ Lun teófilo.

Abürüjatina bun tídan furúmiñetu nigáradan luágu sun le ladügübei Jesúsu, lúma le laráfudajabei, lúmagiñe dan le lagúmeserunbalin luwádigimari ² darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúrgu Jerusalén, laríñaga joun.

—Agúraba jumá lagúnfulirun dimúrei le líchugubei Núguchi jun, le uágubei naríñaga jun. ⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu málüjadün lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oundaragujaña lubeí lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laríñaga Jesúsu joun.

—Siñáti jasúbudiruni ídame lan o cába lan dan ladúgei Núguchi cátei le buri, ligía rügúñein gayára laríñagun ídame lan ladúgei. ⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loúbawagu Judéa, Samária, chülú lúmoun lidíse—ágei fulásu ubouágu.

⁹ Lárigiñe laríñaguni Jesúsu cátei le, sun añája lan aríaguei, ába liñurúniwa lun lanügúniwa siélun, ába liábin ában juánriñu, ába ladáuragun láu, ába maríjin jamáli lan. ¹⁰ Ñíñanu aríagua siélun sun amúdeireina lan Jesúsu, ligía jasáliragun bián wügúriña, jarútu jadáuragun jarúgabu, ¹¹ ába jaríñagun joun.

—Wügúriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanúadirún Matías lewéñeguame Júdas

¹² Ábati jagíribudun disípulugu lueígiñe wúbü le gíribei Olívos lun ubúrugun Jerusalén, lidíse ában kilómetro.

¹³ Dan le jachúlürünbei ubúrugun, ába jamúdeirun tídoun rúmu to ñí lubei jagánawa. Ñíñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraú Álfeo, Simón le lídaanbei adámurini le gíribei Cananísta, lúma Júdas le lamúlen Jacóbo.

¹⁴ Oúndaraguátiñaja sun jagía súnwandan lun jayúmura-gun lun Búngiu jáma lamúlenu Jesúsu, túma María to lúguchu, jáma ja jíbiri würíña.

¹⁵ Luágu ában wéyu lídan dan ligía, ába laráramun Pédro jagíbugiñe sun affíñetiña ja ñíbaña—jawára sanwein gürígia—ába laríñagun joun.

¹⁶ —Nidújeñu, lúnti buga lagúnfulirun le laríñagubei Sífiri Sándu liyúmugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anúgübalin Jesúsu adáüra. ¹⁷ Ában meja jádaangiñe wánigu, Júdas, áni seríwiti lun Jesúsu úara wáma. ¹⁸ Ába lídin, ába lagáñijan ában fulásu láu seínsu le afáyeirúbei lun luágu wuríbani le ladúgübei. Ába láburujuan láu lábulugu únabun, ába lafáünchün, ába láfuridun sun litrípan. ¹⁹ Dan le jagáambunbalin gürígia ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

²⁰ Ába lasígirun Pédro aríñaga.

—Bürúwañu líña dimúrei buri le luágu Júdas tídan líburu to gírīboun Sálmos. Laríñajare ñi.

Reídeitá lúban málouga,
úa jamá aganoútiña tídan.

Aríñagati gíñe ñi.

Rúalá lubára lun ámu.

²¹ ‘Ítara líña lubeíti, lúnti wanúadajan ában wügúri wádaangiñe lé meja wámati sun dan le wáma lubeí Jesúsu, ²² lúmagiñe dan le labásterágüdünbalin Juan Jesúsu darí lúmoun dan le lamúdeirúnbei siélun, lun lewéñegua lan Júdas. Wügúri ligía, líchuguba fe úara wáma luágu lásaarun Jesúsu lídaangiñe ouweni lúnya labágaridun.

²³ Ábati jíridun bián jádaangiñe. José, le méme gíríbei Barsabási, le méme gíñe gíríbei Jústo, lúma Matías. ²⁴ Ába jayúmuragun lun Búngiu ítara.

—Wabúreme, amúrü le subúdijabúbei tun janígi sun gürígia, arúfudabei woun ca lan jádaangiñe bián wügúriña ja anúadira báalíbei ²⁵ lun lesériwidunibu queísi apóstolu lewéñegua Júdas. Ladúga féridi láali

Júdas lubára ladúga lafígounjan, áni ñúdünja lídoun fulásu le ladúnabei.

²⁶ Ábati jíchajaan ubúnuruni, ába láburujan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

¹ Dan lachúlürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ² Sódini ába lagaambún ában ireíni ñúbinti siélugiñe quei dan le láfurun ában garábali jéreti, ába lagaambún tídan sun múna to ñí jabei. ³ Ábati lasáliragún buri cátei joun camá ligémeri wátu, afánreinjouáñu lun ñi lan ában murúsun lougiñe lábulugu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei lueí jerérun quei ladímuregüdüniña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñúbintiña lídaangiñe sun fulásu ubouágu. ⁶ Dan le jagáambunbalin ireíni ligía, ába jóundaragunga gürígia, ibídiñeja joun cába lan jasáminara ladúga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérun guánarü. ⁷ Ába laweíridun janígi, ába jariñagun jámagua.

—¿Ma funági Galiléana ja adímurejabaña? ⁸ ¿Ída liñáti wagáambubaliña adímureja lídan lerérun cáda ában wádaangiñe? ⁹ Añájein gürígia Pártiana ya, Médiana, Elámna, Mesopotámiana, Judéana, Capadóciána, Póntona jáma Ásiana, ¹⁰ Fríjiana, Panfílíana, Ejíptona lúma lídaangiñe buri fulásu África le yagúroun mémebei lueí Ciréne. Añájein giñe Rómána aganoútiña ya, añájein

jádaangiñe, juríu ladúga juríu jamá jagúbürigu, jíbiri, barú jamaali ligáburí jafíñen juríu. ¹¹ Añájein gíñe gürígia Crétana jáma Arábiana, sun wagía agáamba wamútiña adímureja luágu luweírigun Búngiu lídan werérun guá-narü.

¹² Weíríti janígi sún-gubei, ibídiñeja joun cába lan jasáminara, ába buri jálügüdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jaríñagun.

—Bacháruañanúrügü jáña.

Le laríñagubei Pédro joun gürígia ja ñibaña

¹⁴ Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügúriña Judéana jáma sun ja aganoúbaña Jerusalén, agáamba jumeí le lúnbei naríñaguni jun buídu, subúdi jumámugei ca lan lílabei cátei le jaríjubei.

¹⁵ Mabácharuántiña wügúriña ja quei jarítangun, néfugubeigili bináafin guetó. ¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñagunbei.

¹⁷ Lídoun buríme lagúmujoun wéyu, líña laríñagun Búngiu,

noúnajabei náni Espíritu jádoun sun gürígia,

nadímurejaba jayúmulugugiñe jisáanigu.

Nayáwadaguba joun irájüñü,

lúma joun weíyaaña mútu.

¹⁸ Noúnajabei gíñe náni Espíritu jádoun ja esériwidubaña nun lídoun buri wéyu ligía, wügúriña jáma würíña,

ábame nadímurejan jayúmulugugiñe.

¹⁹ Narúfuduba buri cátei garíyawaseti siélu, narúfuduba seíni ubouágu.

láubei jítaü seíni buri ligía, láu wátu geméti, lúma láu
juánriñu láuti gumúlali.

²⁰ Labúrigaduba wéyu,

láfuarame játi funáti quei jítaü,

lubáragiñe lachúlürün luwéyuri Wabúreme,

le lúnbei ában lan wéyu weíriti, le marijínigilíbei líbe.

²¹ Áni sun ja amúriajatiña asálbaruni lúmagiñe Búngiu,
jasálbaruba.

²² ‘Agáamba jumeí lubeíti le lúnbei naríñaguni, jugúya
wügúriña Israelítagu. Jesúsu le Nazarétna, ában meja
wügúri le larúfudubei Búngiu jigíbugiñe quei wügúri
úraguati láu buri cátei weínamuti, miláguru, lúma
buri seíni le ladúgübei Búngiu jagánagua lídaangiñe,
quei le jisúbudin. ²³ Láu sun líra, dan le ledéregerún-
bei jun, quei ligáburu aráansejani le larítagubei Búngiu
lúmagiñe furúmiñeti dan, ába jáfaruni jilágubei láu
jedéregeruni joun wügúriña wuríbatiña lun jádaraguni
luágu gurúwa. ²⁴ Ába leséfuruni Búngiu lídaangiñe lubáfu
óuweni, sarágüda lumúti lúnya labágaridun, ladúga siñá
lan gabáfu lan óuweni luágu. ²⁵ Laríñajare urúei Davíd,
dan le ladímurejan luágu Jesúsu.

Subúdi numúti luágu nómabei lan Nabúreme Búngiu
súnwandan,
noubagiñeñein lun úa lan ni cáta lun lebélaagüdün anú-
fudei nídoun.

²⁶ Ligía lébubei téjerajan nanígi,

ába nadímurejan luágu ugúndani le nídaanbei.

Láu sun wügúri nan garaúwarügüti,

jemenigitina buágu luágu nabágaridayaba lan,

²⁷ ladúga mígirun bubóun nuwáni lídan jabára jiláaña,

mígirun amúrúme lun lañáladun nógubu, áu le bánígu le
jínsiñebei bun.

²⁸ Arúfuda bumúti úma le anúgübei gürígia lídoun ibágari magúmuchaditi nun,

áni babuínchagüdúbadina láu ugúndani láu abúnja lan nubádu.

²⁹ ‘Nidújeñu, cátei furáanguti le, luágu jilá lan meja wadúje Davíd, bunáwa ligía, gayáraagili waríjini lumúaja chülú lumoun wéyu le. ³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfan liábin Crístu, le lúnbei lañúurun luágu lála. ³¹ Adímurejati lubeíti Davíd luágu lásaarun Crístu lídaangiñe ouweni, luágu gíñe merédeboun lan luwáni lídan jabára jiláaña, mañáladun ligíame lúgubu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúseredun. ³² Sarágüda lumúti Búngiu Jesúsu méme le lídaangiñe ouweni, sun wagía geféentiwa luágu líra. ³³ Ñurúgüda lumúti Búngiu lueígiñe loúnwenren láu sarágu uweíríguni, ába lerésibiruni Sífiri Sándu lúmagiñe Búngiu queísi laríñaguni Búngiu lun, lun gayáraabei lan loúnajani méme Sífiri Sándu ligía joun sun lánigu ubouágu. Ligía cátei le aríja jumáalibei lúma le agáamba jumáalibei guetó. ³⁴ Mára Davíd amúdeirubei siélun, aríñagati Davíd guánarügü.

Laríñajare Búngiu lun Nabúreme.

“Ñürúba lueígiñe noúnwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adúga láali lan Búngiu lun ligíaba lan Wasálbaragüle, ligíame gíñe Wabúreme.

³⁷ Dan jagáambunbalin cátei le, ába lebélurun igárigu tídoun janígi, ába jariñagun lun Pédro lúma joun jíbiri apóstolugu.

—Wadújeñu, ¿cábasan wadúga?

³⁸ Ába lariñagun Pédro joun.

—Sáansi jumeí jigáburí ligíbugiñe Búngiu, badísei jugúyame cáda ában lídan líri Jesucrístu, ferúduwawa lámuga jifígoun, ru lámugei Búngiu Sífiri Sándu jun.

³⁹ Ladúga aríñagaali Búngiu luágu líchugubei lan giñe Sífiri Sándu jun, lúma joun jadúgawagun, lúma joun ja aganoúbaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába lariñagun joun.

—Séfu jumá lueí asúfuriruni le lúnbei liábin jawágun gürígia wuríbatíña ja.

⁴¹ Ítara liñáti ába jabásterun, ja adúgübaña gásu láu lerérun, ába jayábin queí buri úrúwa mílu gürígia lun jafíñerun luágu Jesucrístu wéyu ligía. ⁴² Ába jedéregeragun jóungua lun jafúnrendeiruni le jarúfudajabei apóstolugu joun, aganoúa jagía lídan úarani jámagua, ayúmuragua jagía buri lun Búngiu, oúndaragua jagía lun jeíginun fein to arítaguagülei luágu loúnwen Jesús, queísi meja lariñaguni joun apóstolugu lun jadúgüni.

Jabágari furúmiñetiña lánigu Crístu

⁴³ Súngubei láuñanu luweírín anígi luágu buri seíni lúma buri miláguru le ladúgübei Búngiu jádaangiñe apóstolugu. ⁴⁴ Sun ja afíñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajef buri jafúlasun lúma le jámati, ába jafánreinjani lebégi según lemégeirun cáda ában. ⁴⁶ Ságü wéyu jóúndaragun

témpulurugu lun jájuduragun lun Búngiu. Lárigiñe, ába jóundaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegu. ⁴⁷ Ábaja jadímurejan weírigu luágu Búngiu, ábati jínsiñe jamá joun gürígia, ábatija anáajeina láníña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaúnrüin úrüwa rábounwéyu, le lórate ayúmuraguni lun Búngiu. ² Ságü wéyu, ñíñein lan ában wügúri meíbugunti lúmagiñe lagúriajoún, barúwarügütíja añúura lubádu tubéneri témpulu le gírubei “Béna Buídumeraüti” lun lamúriajan seínsu jáma ebélurutiña témpulurugun. ³ Dan le laríjinbaliña meíbugunti ligía Pédro lúma Juan jebélura lan témpulurúgun, ába lamúriajan seínsu jáma. ⁴ Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun.

⁶ Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute. ⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírigin Búngiu. ⁹ Ába jaríjini sun gürígia eíbuga lúma adímureja luágu luweírigin Búngiu. ¹⁰ Weírítiti janígi luágu le

asúseredubei lun, quei subúdi jabálin wügúri ligía, subúdi jamei luágu ligía lan léñaja añúurubei amúriaja tubéneri témpulu le gíríbei “Béna Buídumeraüti”.

Lapúrichijan Pédro témpulurugu

¹¹ Mígiragüdün lumútiñati meíbugunti le areídagubei Pédro lúma Juan, súnti gürígia, ába jeſbaagun láu luweírin janígi luágun tubáranda témpulu le gíríbei Salomón, le ñí jabei. ¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areídaguagüdúbalin wügúri le, eíbugáudei láu wabáfu o láu lan wagúnfulin lúma Búngiu? ¹³ Máma líña, Búngiu, le Jabúngiute binádu wagúbürigu Abrahám, Isáac lúma Jacób, ligía areídaguagüdúbalin wügúri le lun líchuguni líñun-ágei uweíriguni lun Jesucrístu le Liraú, ligíra lé meja jedéregerubei joun lúrudugu, áni dan lálugan Piláto lígiragüdüni, májatün. ¹⁴ Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati. ¹⁵ Ítara líña jáfaruni le íchugubalin ibágari tímatimaati. Ába lásaaragüdüni Búngiu lídaangiñe ouweni, áni geféentiwa luágu líra. ¹⁶ Niján wügúri le jaríjubei áni subúdi jumeí, láu lubáfu méme Jesúsu ligía, lerésibira érei. Wafíñen luágu Jesúsu, ligía areídaguagüdúbalin buídu buídu quei jaríjini.

¹⁷ ‘Subúdi náali, nidújeñu, luágu ibídiñe lán meja jun ca lan jadúgübei dan le jáfarunbálin Jesúsu, jugúya jáma jábutinu. ¹⁸ Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasú-furiruba lan Crístu. ¹⁹ Ligía lubeíti, ígira jumeí binádu

jigáburí, giríbu jumá lun Búngiu, chibáwa lámuga jifí-goun. ²⁰ Ábame ti gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun. ²¹ Láu sun, lúnti lan leréderun Jesucrístu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu. ²² Ítara líña lubeíti aríñagati meja Moisés joun binádu wagúbürigu. “Loúnajaba Wabúreme Búngiu ában proféta jídaangiñe guánarügü quei loúnajanina. Ánja jumá lun sun le lúnbei laríñaguni jun, ²³ ladúga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

²⁴ Ítara líña lubeíti, sun profétagu lúmagiñe Samuél darí lárigiñe, adímurejatiña libúgürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladúgübei Búngiu jáma binádu wagúbürigu dan le laríñagunbei lun Abrahám. “Nabínirubaña sun gürígia ja uboúagubaña láu ában jádaangiñe binébaanfaangu.” ²⁶ Ába lanúadajani Búngiu Liraú lun loúnajani jun furúmiñe, jugúya juríu, lun labínirunün cáda ában jídaangiñe, láu laságarunün lídaangiñe luríban jigáburí.

4

Pédro lúma Juan jagíbugiñe gumádimatiña

¹ Nígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súdeara ja oúnigirubarun témpulu, jáma ja lídaanbaña jadámurin saduséogu. ² Gáñitiña ladúga jarúfudajan Pédro lúma

Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe ouweni lúnya jabágaridun ladúga sará lan Jesúsu. ³ Ábati janúgüniña adáúra, ába jádaruniña furísunrugun darí larúgan quei dárüjali lubeí. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járügü wügúriña, quei buri seíngü mílu.

⁵ Larúgan, ába jóundaragun jábutigu juríu, wügúriña weirigutiña lídan jafíñen, jáma arúfudajatiña lilúrudun Moisés, Jerusalén. ⁶ Níñein gíñe Anás le fádiri le íñuti-maabei, Gáifasi, Juan, Alejandro jáma sun ja jádaangiñebaña lufámilian Anás. ⁷ Ábati jóunajan anúgei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügúri le?

⁸ Buin líña Pédro láu Sífiri Sándu, ába laríñagun joun.

—Jábutigu juríu jáma wügúriña weirigutiña lídan wafíñen. ⁹ quei jálügüdüníwa luágu buíti le adügúbei lun ában wügúri sánditi, ída líña lan lareídawaguágüdün, ¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubeí wügúri le ya jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdübei Búngiu lídaangiñe ouweni, lareídagua. ¹¹ Jesúsu le, ligía queísi dúbü le áubei jíchiga mebére-seni, jugúya le queíbaña ábunagutiña múna, áni ñúbinjali Jesúsu lun ligíaba lan quei dúbü le mégeiwatimaabei lídan bunáguai. ¹² Úati ámu lun lasálbaruníwa lueídügüya Jesucrístu, ladúga míchuti Búngiu ámu íri ubouágu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pédro lúma Juan manúfudeiga ni murúsun, áni subúdi jameí luágu máma jamá gürígia atúriajatiña sarágu, luágu gürígia jamá ja furúmieguaügü, ába laweíridun janígi, ábati jasúbudiruni luágu jádaangiñetiña lan já meja eíbugubaña lúma Jesúsu. ¹⁴ Queíti ññein lubeí wügúri le areídawaguágüdübei jáma, rára ligía, siñáti jaríñagun lúrudugu ni cáta. ¹⁵ Ábati jóunajaniña lúrudugu Pédro lúma Juan lúma wügúri le areídaguualibei boúgudin lueí jadámurin lun gayáraabei lan jayánujan jámagua. ¹⁶ Jaríñagati.

—¿Cábasan wadúga jáu wügúriña ja? Sun ja aganoúbaña Jerusalén subúdi jamúti luágu adúga jamáli lan miláguru le, áni siñáti wayéedagun láu. ¹⁷ Lun mabúrchagun lan ugánu luágu cátei le lídan sun fulásu, wewéridiraña lun madímurejandügüya jamá ni ca un lídan líri Jesúsu lúmagiñe ugúñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jaríñagun Pédro lúma Juan joun.

—Samína jumá júngua ánjein buídu lubeí ligíbugiñe Búngiu lun ladügün le jubeíbei, ígira le lubeíbei Búngiu. ²⁰ Wagía, siñáti wámanichun láu cátei le aríja wamáalibei lúma le agáamba wamáalibei.

²¹ Ábayati jewéridiruniña gumádimatiña, ába jígi-ragüdüniña. Madáritiña ída lúba lan jadügün ni cáta jáu ladúga adímurejatiña buri gürígia buíti luágu Búngiu luágu cátei le asúseredubei. ²² Wügúri le areídagubei láu miláguru ligía, sügú láu bián-wein irúmu láu.

Jamúriajan afíñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába jóúdin le ñí jabei jíbirigu, ába jabájüdaguni sun le jaríñagubei jábutigu fádirigu jáma wügúriña weírigutiña joun. ²⁴ Dan jagáambubalin, ába jayúmuragun sun jagía lun Búngiu, ába jaríñagun.

—Wabúreme, amúrü Búngiubei le adúgübalin siélu, uboú, barána lúma sun cátei. ²⁵ Amúrü, aríñagatibu láu lubáfu Sífiri Sándu liyúmulugugiñe Davíd lé meja esériwidubei bun.

¿Ca uágu jagáñida ja mámabaña juríu,

samína jagía lun jadúgüni cátei le siñábei jadúgüni?

²⁶ Inúraguatiña lurúeitegu uboú jóungua,

oúndaraguatiña lábutigu fulásu

lun jadúgün wuríbani lun Wabúreme Búngiu lúma lun Crístu le lanúadajabei.

²⁷ ‘Áni suséreti ítara, oúndaraguatiña Heródes luma Póncio Piláto lídan ubúругu le, jáma ja mámabaña juríu, lúma jáma Israelítagu lun jadúgün wuríbani lun Biraú Jesúsú le sándubei, le banúadajabei. ²⁸ Láu líra, adúga jamúti sun le baráansejabei lun lasúsereduba lan.

²⁹ Guetóti, Wabúreme, aríjabeí jasíadiruníwa, rúba anígi woun, wagía le esériwidubalibu, lun wadímurejan buágu manúfudeiga, ³⁰ gayára lámuga gíñe wareídaguágüdün sánditiña, adúga wagíame miláguru lídan líri Biraú Jesúsú le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei jóúndaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súnghua luágu

³² Sun ja affiñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súnghua luágu. ³³ Ába jasígirun apóstolugu adímureja luágu lásaarun Wabúreme Jesúsu lídaangiñe ouweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeiruti ni cáta ladúga sun ja gafúlasunbaña o gában, ába buri jalúgurunun, ába janúgüni tebégi, ³⁵ ába jadéregeruni joun apóstolugu lun lafánreinjoun jádan ja emégeirutiña. ³⁶ Queíburi, ñíñein ában jádaangiñe ladúgawagun Leví jádan, gíriti José, agúriajóuti luágu ubouju le gíríbei Chípree, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügúri ligía, ába lalúguruni lufúlasun, ába lanúgüni seínsu edégera joun apóstolugu.

5

Jafígoun Ananías túma Safíra

¹ Ñíñein gíñe ában wügúri gíriti Ananías, túma Safíra, to lúmari, ába gíñe jalúgurun ában fulásu. ² Wügúri le, ába lanúgün lídaangiñe seínsu, ába lídin láu líbiri joun apóstolugu, lafámura camá jamuga ligía rügúñein libíjin luágu fulásu. Áni subúsititi sun cátei tun lúmari. ³ Ábati laríñagun Pédro lun.

—Ananías, ¿ca uágu bígira lun lagáñiruni Máfia barítangun lun layéejagüdúnibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badúgüni le babúseerunbei láu? ¿Ca

uágu basáminara badúgüni cátei le? Búngiu bálugubei bayéedagun, máma wügúriña.

⁵ Dan lagáambuni Ananías cátei le, ába láburujan oúwe. Súnti ja asúbudirubalin cátei le, ába janúfudedagun.

⁶ Ábati jayábin wügúriña, ába joúburaguni Ananías, ába janúgüni ábuna.

⁷ Quefburi úrüwa óra lárigiñe, ába tebélorun lúmari Ananías, ibídiñoun ni cáta tun luágu le asúseredubei.

⁸ Ába laríñagun Pedro tun.

—Aríñagabei nun, ¿luágu ebégi le jaríñagubei jalúgurei fulásu?

Ába taríñagun.

—Ánja, luágu ebégi ligía.

⁹ Ábati laríñagun Pedro.

—¿Ca san uágu jebélura lídoun úraduni lun joúchaguni láni Búngiu Espíritu ítara? Añatén ja anúgübalin búmari ábuna, janúgadibu gíñe.

¹⁰ Lídan méme óra ligía, ába táburujan oúwe lubádu lugúdi Pedro. Dan jebélurun wügúriña, jadáriroun jiláaru, ába jaságarunun, ába jábununun loúbagiñe túmari. ¹¹ Súnti güriñia ja afíñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan güriñia, ábati buri joúndaragun sun afíñetiña lídan fulásu témpulurugu le gírabei “Barandá Salomón”. ¹³ Úati meja ni ában jádaangiñe ja mámabaña afíñetiña lun joúndaragun jáma afíñetiña ladúga janúfude, láu sun jínsiñe jamá sun afíñetiña joun güriñia, sarágu. ¹⁴ Eíbu wéyu, eíbu jayábin güriñia lun jafíñerun luágu Jesucrístu, dándu wügúriña queísi würiña. ¹⁵ Quei

jadúgüña lan apóstolugu sarágu miláguru, ába jaságaraguniña gürígia sánditiña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu. ¹⁶ Núbintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatiña, sun jagía areídaguátiña.

Jeíbaajóun Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janúgüniña apóstolugu, ába jadáürüniña. ¹⁹ Ába ladáraruni ában láni Wabúreme Búngiu ánjeli tubéneri furísun árieibu ligía, ába láfuridagüdúniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja ñíbaña luágu iséri ibágarí le líchugubei Jesucrístu joun gürígia.

²¹ Dan jagáambuni cátei le, ába jóudin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóundaruniña líñun-ágei lúrudu, ja súnbaña Israelítagu weírigutiña, ába jóunajan anúgaña apóstolugu furísunrugugiñe. ²² Dan jachúlürünbei polisía furísunrugu, madári jamútiña ñi. Ába jagíribudun, ²³ ába jaríñagun.

—Darúñu líña wadárirunun furísun, ñíñanu súdaara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalín jábutigu fádorigu lúma jábuti súdaara ja oúnigirubarun témpulu cátei le, ába jálügüdagun jóungua cába lánfuna ídan lébeda cátei le. ²⁵ Lídan óra ligía, ligía liábin ában wügúri, ába laríñagun joun.

—Ja wügúriña ja jádarubaña furísunrugun, añájein témpulurugu arúfudaja joun gürígia.

²⁶ Ábati lídin jábuti óunigirutiña jáu súdeara, ába janúgüniña láu buídu, ladúga janúfude lueí jachámuragun gürígia dúbü jawágun. ²⁷ Dan jachúlürün jáu, ába jíchuguniña ligíbugiñe líñun-ágei lúruudu, ába laríñagun fádiri íñutimaati joun.

²⁸ —Wéridi wamáadün lun marúfudajandügüya jumá lídan líri Jesúsu, áni ¿ca jadúga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügúri ligía.

²⁹ Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadúgüni le lubeíbei lubáragiñe le jabeíbei wügúriña. ³⁰ Le Jabúngiute binádu wagúbürigu, ligía ásaaragüdúbalin Jesúsu, le méme jáfarubei láu jádaraguni luágu ában gurúwa. ³¹ Rúlaali Búngiu uweíriguni lun, ñurúgüdaleí lueígiñe loúnwenren, adúga láali Ábutime lúma Asálbaragülei, gayára lámuga jígiruni Israelítagu binádu jagáburi, lun gíñe ferúduwawa lan jafígoun. ³² Geféentiwa luágu líra, geféenti gíñe Sífiri Sándu le líchugubei Búngiu joun ja ñúdümbaña láu le lubeíbei.

³³ Dan jagáambunbalin líñun-ágei lúruudu cátei le, ába jagáñidun, ába yebe jabúseerun jáfaraguniña jilágubei. ³⁴ Níñein ában fariséo jádan lúrudugu, gíríti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janügúniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúruudu. ³⁵ Ába laríñagun joun gumádimatiña.

—Wügúriña Israélna, toúnigi jumátia láu le lúnbei jadúgüni jáu wügúriña ja. ³⁶ Jarítagua jumátia luágu iñúragua lán meja Teudás lúngua aríñaga luágu ában lan wügúri weíriguti ligía, ába jafálaruni gádürü-san wügúriña, áni afarúati jilágubei, súnti ja afálarubalin, ába jawáragadagun, ába lagúmuchun sun cátei. ³⁷ Lárigiñe, lídan lidáani jabájüdúniwa gürígia, ligía liñúragun Júdas le Galiléana lúngua, sarágu jáña afálaruti lídan labúseerun yebe lagáragabun luágun gumádi. Áfarúati gíñe, ába gíñe jawáragadagun sun ja afálarubalin. ³⁸ Ígira jumáña lubeíti wügúriña ja, memétera jumá jámoun. Ladúga ánjein jáni lubeí wügúriña cátei le jarúfudajabei lúma le jadúgübei, lagúmuchaguba, ³⁹ ánjein láni lubeí Búngiu, siñá jubei agúnrinchagua. Touñigi jumá, mageíndagua jumá lúma Búngiu.

⁴⁰ Ába jánjanrun súnigubei láu le laríñagubei. Ábati jebélaagüdüniña apóstolugu, ába jabeíchuniña, ába jaríñagun joun lun jebé lan jadímurejan lídan líri Jesúsu. Lárigiñe, ába jígiragüdüniña, ⁴¹ Ába jáfuridun apóstolugu jámagiñe lúrudugu, gúndaañu láu laríjiniña Búngiu queísi gürígia gadúnamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tídan buri múna ságü wéyu, aríñaga jagía luágu Jesúsu lan Crístubei le agúrabajóubei.

6

Jáluajóuniwa sédü ídejatiña

¹ Lídan dan ligía, quei agíbedeina jamátima affñetiña luágu Jesucrístu, ába jagúmeserun ja adímurejabaña güriégu adárira jadúnrun ja adímurejabalin jerérun juríu, ába jaríñagun luágu mibíjin jamá würiña güriégu ja

jiláañabaña úmari eígini dan le lafánreinjoúniwa, ságü wéyu. ² Ábati jóundaruniña dúusu apóstolugu affñetiña, ába jaríñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eígini. ³ Ligía lubeíti nidújeñu, áluga jumá sédü wügúriña jídaangiñe ja gaffñerúati jawágu, ja chúbaña áu, ja derégeguatiña jóungua lun Sífiri Sándu le gumúti, lun jadúgüni wadágimanu le. ⁴ Wagía, wedéregerubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súngubei lídan cátei le, ába janúadiruní Estéban, le ában wügúri buín líña láu affñeni luágu Jesucrístu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquíana, lé meja afálarubalin ligáburi jaffñen juríu. ⁶ Ába janúgüniña le ñíjin jabeí apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía affñetiña Jerusalén furése, ába giñe jaffñerun sarágu fádirigu juríu luágu Jesucrístu.

Ladáürün Estéban

⁸ Adáaguatíja Estéban, le ábanbei wügúri le buínbei láu ubáfu lúma abíniruni lúmagiñeti Búngiu, miláguru lúma seíni jádan gürígia. ⁹ Ábati jagúmeserun gürígia asígeneja luágu, gürígia jagía, tídaangiñetiña jalígilisin juríu to gíríboun “Idámunigu Jóunguaaña”, jáma Ciréneña, Alejandríana, Cilíciana jáma Ásiana. ¹⁰ Siñáti joun lúma Estéban, ladúga láu lichú áu le líchugubei Sífiri Sándu lun ladímureja. ¹¹ Ábati jafáyeirun wügúriña lun jaríñagun

luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdúniña gürígia, jáma arúfudajatiña lilúrudun Moisés, jáma wügúriña weírigutiña lídan jafíñen juríu, ába járügüdüni Estéban, ába janúgüni ligíbugiñoun líñun-ágei lúrudu. ¹³ Ába giñe jálugun yéetiña lun jaríñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jaríñaga.

—Agáamba wamúti laríñagun luágu lagúnrinch-aguboun lan Jesúsu Nazarétna témpulu, sáansi leíme igáburi le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímurejan Estéban luágu lufúleisein

¹ Ábati laríñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagúbürigu, agáamba jumána. Weíriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán.

³ Ába laríñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.”

⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanúgüni Búngiu Abrahám lídoun fulásu le ní lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachúlürüba lan dan lun lánibei lan ageíraü le jáu sun ladúgüwagun, láu sún meja marájüñügili lan Abrahám lídan dan ligía. ⁶ Aríñagati

Búngiu lun luágu jaganoúba lan ladúgawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu. ⁷ Aríñagati gíñe Búngiu lun. “Nagúseragüdübaña lílana fulásu le anúgübaliña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.” ⁸ Adúgati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagúriajóunbei liraú Abrahám le Isáac, ába lerésibiruni circuncisión luágu wídü wéyu láu, ítara gíñe ladúga Isáac lun Jacób le liraú, adúgaleí Jacób, le méme gíribei Israél, joun dúusu lirájüñü, ja jagúbürigubaña dúusu türíbu ja gíribaña Israelítagu guetó.

⁹ ‘Lirájüñü Jacób ja, ja binádubaña wagúbürigu, ába jagímugajan lun José le jamúlen, ába jalúguruni lun lanügún Ejíptoun quei idámuni. Níñein Búngiu lúma José, ¹⁰ ába leséfuruni lídaangiñe sun lidíjeri láu líchugun gunfaráandaü lun. Ába lagáñeiragúdüni lufúleisein Faraón, le lurúeite Ejípto lun, ába líchuguni José ábutime ñi Ejípto lúma tídan lúban Faraón.

¹¹ ‘Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagúbürigu cába lan jeíga. ¹² Ába lagáambun Jacób luágu níjein lan eígini Ejípto, ába louñajaniña lirájüñü, ja binádu wagúbürigu, ñi. Ligía furúmiñetibeí jaweíyasun. ¹³ Le libíaman jóudin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. ¹⁴ Ábati louñajan José anúgei Jacób le lúguchi jáu sun lufámilian, Ejíptoun, úrüwañanu-weinqueínsi gürígia jagía. ¹⁵ Ítara líña lídinbei Jacób agánawa

Ejípoto, le ñí lubei loúwe, ñí lubei giñe jóúwegua binádu wagúbürigu. ¹⁶ Átiri irúmu lárigiñe, ába lanügúniwa jábu ñígiñe lídoun fulásu le gríbeí Síquem, ába jabunún lídan umúajaü lé meja lagáñijabei Abrahám jámagiñe lirájüñü Hamor ñi Síquem.

¹⁷ ‘Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladúgawagun Israél Ejípoto. ¹⁸ Ábati lagúmeserun ában urúei agúmadija Ejípoto le ibídiñejabubei lun José. ¹⁹ Ába layéeragu- niña urúei ligía warásan juríu, amúdiragua láña binádu wagúbürigu, águragüdáña jasáanigu ja figígiña joun lun jóúwegun, gumúgua lámuga warásan. ²⁰ Lídan dan ligía, ligía lagúriajoun Moisés, ában irájü buídumerauti, ába jagúriajani lagúbürigu jábiñe luágu úrüwa játi. ²¹ Dan lachúlürünbei dan lun jáguruni, ába jáguruni, ába tabú- duni liraú urúei Ejípoto, ába tagúriajani quei tiraú. ²² Ligía lafunrendeirubalin Moisés lichú jáu Ejípoto, áni gabáfutiti lídan le laríñagubei lúma le ladúgübei.

²³ ‘Dan le bián-weñjali irúmu láu Moisés, ába lálugun lídin aríjaña lirásan ja ladúgawagun Israél, ja ñíbaña Ejípoto. ²⁴ Ába laríjin ában Ejípoto amúdiragua ában já- daangiñe, ába lídin Moisés íderaguei lidúje, ába leséfuruni láu láfaruni Ejípoto ligía jilágubei. ²⁵ Moisés, jarítaguati luágu jasúbudirúbei lan Israelítagu luágu ligíaba lan layú- sura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. “Ában mémetia mútu jugúya, ¿ca uágu jageíndagua júmagua?” ²⁷ Ábati ládaruni wügúri le áluajabei wuríbu lúma le ában, ába laríñagun lun.

“¿Ca íchubalibu ábutime lúma agúseragüdütime wádan?
²⁸ ¿Buséntibu gíñe báfarunina quei báfaruni Ejiptona
 ligíra guñaarú?” ²⁹ Dan lagáambuni Moisés cátei le, ába
 lanúrajan, ába lídin Madiáoun. Ába leréderun agánawa ñi
 quei teréncha, ába jáguchi lan bián irájüñü ñi.

³⁰ ‘Bián-wein irúmu lárigiñe, ába lasálriragun ában ánjeli
 lun lídan fulásu mageírawati, yaráfa lun wúbü le giríbei
 Sinaí, liábin lun quei wátu geméti lídan ában búbugati.
³¹ Ába laweíridun lanígi Moisés láu cátei le laríjubei, dánti
 layárafadun lúntima laríjini buídu, ába lagáambun laríña-
 gun lumálali Wabúreme Búngiu. ³² “Áu Jabúngiute binádu
 bagúbürigu, Lubúngiute Abrahám, Lubúngiute Isáac lúma
 Jacób.” Ábati lagúmeserun Moisés adádagara láu anú-
 fudei, májaali ni lun laríjin ñíjin. ³³ Ába laríñagun Búngiu
 lun. “Gidáboun bigeídín lueígiñe bugúdi, ladúga fulásu
 le ñí bubei rára, fulásu sánduti. ³⁴ Aríja náali jasúfurirun
 numútuniña Ejipto, agáamba náali jagúajan láu igárigu,
 neséfuraaña lubeíti. Jigábu lubeíti, noúnajadibu Ejipto.”

³⁵ ‘Láu sun mebéresen jamá láu Moisés, álügüda jameí
 ca lan íchubalin ábutime lúma agúseragüdütime, oúnaja
 lumúti Búngiu quei ábuti lúma quei eséfujati, adímure-
 jeina Búngiu lídaangiñe ánjeli le asálriragubei lun lídan
 búbugati. ³⁶ Moisés aságarubaliña binádu wagúbürigu
 Ejiptogiñe, adúga ligía miláguru buri lúma buri cátei
 weíriguti lídan fulásu ligía, lídan Barána Funáti, lúma lí-
 dan fulásu mageírawati, luágu bián-wein irúmu. ³⁷ Moisés
 meme le, ligía aríñagubei joun Israelítagu. “Loúnaja
 Búngiu ában proféta jun jádaangiñe guánarügü
 jibíriña, quei loúnajanina. Adúga jumá gásu láu.”
³⁸ Lídan le añája lubeí Israelítagu adámurigu lídan fulásu
 mageírawati, Moisés méme le, ába ladímurejan lúma án-

jeli luágu wúbü le Sinaí, ába lásügüragüdüni lerérün ánjeli ligía joun binádu wagúbürigu. Ligía le erésibirubalin ugánu le adúrarubei lun sun dan lúmagiñe Búngiu lun lásügüragüdüni woun.

³⁹ ‘Májatiña meja binádu wagúbürigu jagáambuni Moisés, mebéseruntiña láu, busénrügü jagía jagíribudun Ejíptoun. ⁴⁰ Ábati jaríñagun lun Aarón. “Buséntiwa lun badúgün búngiugu woun lun jóúdin wabá wabá, ladúga ibídiñeti woun ca lan susérebei lun Moisés, le aságarubaliwa Ejíptogiñe.” ⁴¹ Ábati jadúgün ában tiyáwa bágasu lun jasándunme, ába jáfarun anímaalugu lun jadágaragüdün tun jasándun, ába jadúgün fédu lun jagúndaarun láu cátei le jadúgübei láu jájabu. ⁴² Ábati ladíreirun Búngiu jaweí, ába lígiriñe lun jájuduragun joun warúguma ja siélubaña. Ítara líña labúrüdún tídan jalíburun profétagu.

Jugúya Israelítagu, ¿áfaratün funági anímaalugu lun jadágaragüdün nun lídan bián-wein irúmu le jáubei lídan fulásu mageírawati?

⁴³ Madúgün jumúti líra, lubáragiñe lira, barú jumuti jisándun Molóc tídan lágei to jadúgüboun lun, túma tiyáwa warúguma to gíriboun Renfán, to gíñe janúgüboun quei jisándun, iyáwaü buri ja jadáagun guánarügü lun jájuduragun joun. Ligía naságarubadún lubeí jageíragiñe, noúnajaünme yagúroun méme lueí Babilónia.

⁴⁴ ‘Lídan fulásu mageírawati, ñíñoun méja lúban Búngiu to gadíñurúwadiboun jáma binádu wagúbürigu, ñí lubei lerédera Búngiu jáma. Adúga lumútu Moisés lúban

Búngiu tugúya queísi larúfuduni Búngiu lun lun ladúgünun. ⁴⁵ Nújeingua méja múna tugúya jáma jadúgawagun binádu wagúbürigu, ába janúgünun jámawagua lídoun fulásu le ñí lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara liña, nújeingua lubeí lúban Búngiu tugúya lídan fulásu le darí lidáni Davíd. ⁴⁶ Daríti urúei Davíd fuleísei ligíbugiñe Búngiu, ába labúseerún yebe ladúgün ában témpulu lun laganoún Lubúngiute Jacób ñi, ⁴⁷ Salomón adúgubarun témpulu tugúya, ⁴⁸ láu sun, maganoún lan Búngiu le weíriguti-maabei tídan buri ligílisi to jadúga gürígia, queí meja laríñaguni proféta.

⁴⁹ Siélu nálabei le ñí lubei nañúura lun narúeijan, uboú, le ñí lubei neméraaguagüdei nugúdi.

¿Cába tuwúyeri múna jadúga nun? líña laríñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadúga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagúbürigu. ⁵² ¿Ca jádaangiñe profétagu mouserun jabáña binádu jagúbürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacúnrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélun, ába laríjini luweírigun Búngiu, lúma Jesúsu rára lueígiñe loúnwenren Búngiu. ⁵⁶ Ába laríñagun joun.

—¡Aríja jumá! Aríagu níña lun siélu darágu, lúma Jesúsu le Wügúri Garaúwarügüti, lueígiñe loúnwenren Búngiu.

⁵⁷ Ába jadáuruni jarígei láu jájabu lueí jagáambuni, ába jayábin sun jagía luágun, agúarajeina. ⁵⁸ Ába jaságaruni ubúrugugiñe, ába jígirunun geféentiña janáangun lábugiñe laríaaan ában wügúri gíriti Sáulo, ába jachámuragun dúbü luágun Estéban. ⁵⁹ Súnti añája lan achámuragua dúbü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájjuduragun, ába lagúaragun.

—Nabúreme, míchigabá dúru jawágun lueígiñe figoú le. Lárigiñe laríñaguni le, ába loúnwen.

8

Leíbaajaniña Sáulo ja afíñebaña luágu Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eíbaajoúni jawágun ja afíñebaña luágu Jesucrístu, Jerusalén. Ába janúragun lídoun buri lirájüñü fulásu Judéa lúma Samária le míbetiña gürígia ñi, apóstologu rügüñanu manúrajan. ² Ába jayábin wügúriña ja derégeguatiña jóungua lun Búngiu, ába jábununi Estéban láu sarágu íruni luágu loúnwen. ³ Ábati lasígirun Sáulo eíbaajaña afíñetiña, ábaja lebélurun tídoun sun múna

lun laságaruniña wügúriña jáma würiña adúruujeina, ába loúnajaniña furísunrugun.

Lapúrichijóun ugánu buíti luáguti asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chülú lan Jesucristu lun lasálbaruniña sun gürigia, sun le ñí lumuti jóudin. ⁵ Ába lídin ában jádaangiñe, gíriti Felípe, lídoun ában ubúругu Samária, ába lagúmeserun adímureja joun ja ñíbaña luágu Cristu. ⁶ Ábaja jóundaragun gürigia, ru jagía jarigei lun le ladímurejabei Felípe, aríja jamei buri gíñe miláguru le ladáagubei. ⁷ Ladúga sarágu buri gürigia ja gawágutiña espíritugu wuríbatíña, areídaguátiña, ába buri jáfuridun espíritugu wuríbatíña jagía agúarajeina jádaangiñe, areídagua jagía sarágu derégüdaaña jamá, meíbuguntiña. ⁸ Súnti gürigia lídan fulásu ligía, gúndaatiña luágu cátei le.

⁹ Níñein ában wügúri lídan fulásu ligía, gíriti Simón, gabíñarajati meja, lúñajaali ayéejaña gürigia Samariána láu laríñagun joun luágu máma lan furúmieguarügü gürigia ligía. ¹⁰ Agáambaja jamútítija sun gürigia buídu, jámagiñe ja gudémegutiña dagá jámoun ja weírigutiña, ába jaríñagun.

—Íbija lumúti gürigia le óunwenbun lubáfu Búngiu.

¹¹ Adúgatiñatija gásu láu, ladúga lúñajaali ayéejaña láu labíñarajan. ¹² Dan le jafñerunbei luágu ugánu le líchugubei Felípe joun luágu larúeijan Búngiu lúma luágu Jesucristu, dándu wügúriña quei würiña, ába jabásterún. ¹³ Simón meme ligía ába gíñe lafñerun, ába gíñe labásterún, ába lagúmeserun afálarei Felípe, le luweírín lanígi láu buri óunwenbun buri miláguru lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáali lan Samariána lerérun Búngiu, ába jóunajani Pédro lúma Juan ñi. ¹⁵ Dan le jachúlürünbei, ába jayúmuragun jawágu affñetiña ja Samariána lun liábiba Sífiri Sándu jádoun, ¹⁶ ladúga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñúbin lan Sífiri Sándu jádoun güriquia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu.

¹⁹ Ába laríñagun joun.

—Rújumei giñe ubáfu le nun, lun dánme lan níchuguni nújabu luágu furúmieguárügü, lun giñe lerésibiruni Sífiri Sándu.

²⁰ Ábati laríñagun Pédro lun.

—Beíba máfiougatin láu sun biseínsun, ladúga jarítaguatibu luágu gayára lan lagáñijoún cátei le ledeweegan Búngiu. ²¹ Maríchatibu, mafánran bugúya lídan weseriwidun lun Búngiu, ladúga múaraantu banígi ligíbugiñe Búngiu. ²² Ígirabeí buríban le, ayúmuraguabá lun Búngiu, lun ferúduna lánibu luágu luríban barítangun. ²³ Ladúga aríja numúti luágu buin tíña lan banígi láu wuríbani, áni ragúñu liñálibu Máfia.

²⁴ Ábati laríñagun Simón.

—Ayúmuragua jumá lun Búngiu nuágu lun masúsere-dun lan ni cáta nun lídaangiñe le jaríñagubei.

²⁵ Lárigiñe jíchugun fe luágu Jesucrístu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu güriquia lídaangiñe jafígoun lídan sarágu lirájüñü fulásu Samária, luágu jaweíyasun járigoún Jerusaléoun.

Felípe lúma wügúri le Etiopíana

²⁶ Lárigiñe cáte le, ába laríñagun láni Wabúreme Búngiu ánjeli lun Felípe.

—Aráansebá, beíba luágun sur lídaangiñe úma le arárirubei Jerusaléngiñe lun ubúrugun Gáza.

Ligía úma le ásügürübei lídaangiñe fulásu mageírawati.

²⁷ Ába laráanserun Felípe, ába lídin. Luágu leíbuguniwágu, ába ladárirun ában wügúri Etiopíana lubá lubá. Wügúri ligía siñáti garaú lan, ában wügúri weíriguti, ligía gíñe gamánijaribei láu sun tiseínsun Candáce to lurúeite Etiopía. Liábiñati wügúri ligía Jerusaléngiñe lárigi lídin ájuduragua lun Búngiu. ²⁸ Lagíribuduñáti lageíroun, ñun tídan ában cárü, alíjeinaloún lilíburun proféta Isaías.

²⁹ Ábati laríñagun Sífiri Sándu lun Felípe.

—Yaráfabá tuágun cárü túra.

³⁰ Ába leíbaagun tuágun cárü, ába lagáambuni lalíjajaña lan tídan lilíburun Isaías, ába laríñagun lun.

—¿Gunfaráanda bumútisan le balíjabei?

³¹ Ába laríñagun wügúri ligía lun.

—¿Ída lubági gunfaráanda náani, úaga cába lan afún-raanguágüdei nun?

Ába laríñagun lun Felípe lun ládinun lúmoun lun lañúurun lóubagiñe.

³² Niján buri dimúrei le lalíjabei.

Quei mudún, lanügúwa lun lafarún jilágubei, ítara quei leréderun mudún maníñu jagíbugiñe ja ásarubalín líyu, ítara líña gíñe maríñagun lan ni cáta.

³³ Únabuti lanügún, áni michugúnwati lirícha lun, siñábei ladímurejoún jawágu ladúgawagun, ladúga gumúja lan labágaridun uboúagu.

³⁴ Ába laríñagun wügúri ligía lun Felípe.

—Adúgabei fuleisei nun, aríñagabei nun, ¿cáteisán le uágubei laríñagei wügúri le abúrújabei dimúrei le, lu-ougua, ódi luágu ámu?

³⁵ Ábati lagúmeserun Felípe arúfudajei Lerérun Búngiu lun, lúmagiñe le ñígiñe lubei lagúmesera alíija, ába líchuguni ugánu luáguti Jesúsu lun. ³⁶ Dánti le jásügürün-bei lídaangiñe ában fulásu le ñí lubei dúna, ába laríñagun wügúri ligía.

—Nijántia dúna, ¿siñátisan nabásterun?

³⁷ Laríñaga Felípe lun.

—Ánjein afíñe bubei luágu Jesucrístu táu sun banígi, gayáraati babásterun.

Laríñaga wügúri ligía lun.

—Afíñetina luágu Jesucrístu lan Liraúbei Búngiu.

³⁸ Ábati laráramagüdúnun cárü, ába jarárirun biángubei jagía dúnarugún, ába labásterágüdüni Felípe. ³⁹ Dan jamúdeirun dúnarugugíñe, ába lanúgüni láni Búngiu Espíritu Felípe ñígiñe, ába maríjin láali lan wügúri ligía. Ába lasígiruni lebugun, gúndaañu. ⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichi-jeinalei ugánu luáguti Crístu darí lachúlürün Cesaréa.

9

Lerésibiruni Sáulo Crístu queisi lasálbaragüle

¹ Sun dan ligía, merédeti lasíadiruniña Sáulo afíñetiña luágu Jesucrístu. ² Ligía lídinbei lúmoun fádiri íñuti-maati lídan jafíñen juríu amúriaaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Crístu lun lanúgüniña adáüragua

Jerusalén, dándu wügúriña quei würiña. ³ Luágu leŕbuniwágu, dan yaráfaali lun Damáscu, sódini ába ladún-raagun ában larúgounga siélugiñe, geyégua láu. ⁴ Ábati láburijan Sáulo múarugún, ába lagáambun laríñagun ában umálali lun.

—Sáulo, Sáulo, ¿ca uágu beŕbaajana?

⁵ Ábati laríñagun Sáulo.

—¿Cátabusan Nabúreme?

Ába laríñagun umálali ligía.

—Jesúsu áu, le méme beŕbaajabei. ⁶ Sarába, belúba ubúrugun, laríñawagúba bun ñi cába lan badúga.

⁷ Wügúriña ja úarabaña lúma Sáulo lídan luweíyasun, ába jaráramun láu luweírín janígi ladúga agáamba jamúti umálali, áni maríjin jamúti le adímurejabei. ⁸ Ába lásaarun Sáulo múarugugíñe, dan le léfegechúnbalin lágu, maríjinjali. Ábati járügüdüni lújabu, ába janúgüni ubúrugun Damáscu. ⁹ Ába leréderun úrüwa wéyu ñi maríjina, meígin líña, mátun ni cáta.

¹⁰ Ñíñein ában affíñeti luágu Jesucrístu ñi Damáscu gíriti Ananías, le únbei layáwadagua Wabúreme Jesúsu, ába laríñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesúsu lun.

—Beíba guetó guetó luágu úma le gíribei Surúti, danme le bachúlürün lúbiñe Júdas, bálügüdajame luágu ában wügúri Társona gíriti Sáulo. Badárirubei ñi ayúmuragua lun Búngiu, ¹² áni ayáwadaguaali ában wügúri gíriti Ananías lun, ába líchuguni lújabu luágu lun gayára lan laríjin.

¹³ Dan lagáambunbalin Ananías cátei le, ába laríñagun. —Nabúreme, gíbeeñátia abájüdagutiña nun luágu wügúri ligía lúma luágu sun wuríbani le ladáagubei joun ja afíñebaña buágu, Jerusalén. ¹⁴ Guetó, liábiña ñájoun láu ubáfu jámagiñe jábutigu fádirigu lun ladáüraguniña sun ja bánigubaña.

¹⁵ Ába laríñagun Jesúsu lun.

—Beíba, ladúga anúadira náali wügúri ligía lun ladímurejan nuágu joun güriquia ja mámabaña juríu lúma joun jarúeitegu, lúma gíñe joun Israelítagu. ¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñí lubei Sáulo. Ába lebélorun múnadoun, ába líchuguni lújabu luágu, ába laríñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu úma le ñígiñe lubei biábin, lun gayáraaya lan baríjin, lun gíñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueígiñe lágu, ábaya laríjin. Lídan óra ligía, ába labásterún. ¹⁹ Lárigiñe, ába leígin, ábaya lejéredun, ába leréderun átiri wéyu jáma afíñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraúbei Búngiu.

²¹ Súnti ja agáambubalín, ába laweíridun janígi, jaríñagati.

—¿Másan niján wügúri léñaja eíbaajabáliña ja afálarubalin Jesúsu Jerusalén? ¿Ma ligía méme le ñúbinbei ya lun lanáanguniña adáüra, lun ledéregeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürígia lí-daangiñe jafígoun, darí lun labúlieidaguágüdün jáu juríu buri ja aganoúbaña Damásco.

Leséfurun Sáulo jawéi juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdün le jabúseerubei jadügün lun Sáulo. Wéyuagu, áriebu, jagúrabanja juríu luágu béna le áfuridagülei le láni ubúru gu Damásco lun jáfaruni jilágubei. ²⁵ Ába jíchuguni affñetiña lídoun ában faníñe weíríti, ába jarárigüdúni áriebu lueígiñe baríeru le geyégubei láu ubúru gu, ába leséfurun.

Sáulo ubúru gu Jerusalén

²⁶ Dan le lachúlürünbei Sáulo Jerusalén, ába yebe lálugun ládaragun lúngua jádoun affñetiña, sun jagía, janúfudetiña lueí, ladúga mafíñetiña yebe luágu affñe-jali lan luágu Jesucrístu. ²⁷ Ába lanúgüni Bernabé jagíbugiñoun apóstolugu. Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúru gu Damásco. ²⁸ Ábati jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesúsu furáangu. Lá-rigiñe ladímurejan luágu Jesúsu jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei. ³⁰ Dan le jasúbudirúnbalin affñetiña cátei le, ába janúgüni Sáulo ubúrugun Cesaréa, ñígiñe ába jóunajani Társoun.

³¹ Lídoun buri dan ligía, buíti jóuserúniwa affñetiña luágu Jesucrístu ja aganoúbaña Judéa, Galiléa, lúma

Samária. Ába jedérebugudún lídan jaffñen luágu Jesucrístu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá affñerutiña.

Lareídagun Enéas

³² Dan le lebélujaña lubeí Pédro lídan buri fulásu lun líderaguniña ja affñeñaabaña luágu Jesucrístu, ába gñe lídin aríjaña lánigu Búngiu ja ubúrugubaña Lída. ³³ Ñi ladárira ában wügúri gíriti Enéas, wídü irúmu láu gabá-narugu láu derégüdaü. ³⁴ Ába laríñagun Pédro lun.

—Enéas, areídaguagüda lumútibu Jesucrístu. Sarába, aráanseboún bigábana.

Ába lásaarun Enéas óra ligía. ³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jaffñen, ába jaffñerun luágu Jesúsü.

Tágyuygun Dórcas

³⁶ Lídan meja dan ligía, ññoun meja ában affñetu aganoútu Jópe, gíritu Tabíta, lídan jerérun güriégu, gíritu Dórcas. Wúri tugúya, súnwandan táu adúga buíti, íderagua tugúya gudémetiña. ³⁷ Lídoun dan ligía, ába tasándirun Dórcas, ába toúnwen, lárigiñe jágawagüdünun, ába jaríwachaguagüdünun. ³⁸ Yaráfati Jópe lun Lída le ñí lubei Pédro, queíti jagáambuni affñetiña luágu níjein lan ñi, ába jounajan bián wügúriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachúlürünbei, ába janúgüni tídoun rúmu to ñí tubei jiláaru, ába jagúriridágun sun würiña ja jiláguaañábaña úmari láu, ayájuaja tá-rigi, arúfudajoún buri dínugu túma simísi tó buri tájüch-aguboún Dórcas dán meja moúnwengiru, lun. ⁴⁰ Ába láfuridagüdúniña Pédro sun ja ñíbaña, ába lájuduragun,

ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan taríjini Pédro, ába tiñúra-gun túngua. ⁴¹ Ába lárügüdüní tújabu, ába lásaaragüdúnun. Lárigiñe, ába lagúarun joun würíña jagía jáma jíbiri affñetiña ja ñíbaña, ába larúfudunun joun, wín-waño. ⁴² Ába lagaambún cátei le lídan sun ubúругu Jópe, ába sarágu jamá affñerutiña luágu Jesucrístu. ⁴³ Ába leréderun Pédro sarágu dan lídan ubúругu ligía, lúbiñe Simón le aráansejabei úraü.

10

Loúnajan Cornélio ougei Pédro

¹ Ñíñein ában wügúri ubúругu Cesaréa gíriti Cornélio, gumándan joun súdaara ja Italiána. ² Wügúri ligía jáu sun lufámilian, derégeguatiña joúngua lun Búngiu, judúguatiña lun Búngiu láu sun máma jamá juríu. Rúti buri gíñe sarágu seínsu lun jíderawagún juríu, áni sún-wandan layúmuragun lun Búngiu. ³ Luágu ában wéyu, queí buri ladaúnrún úrüwa rábounwéyu, ába lasáliragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aráaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjaleí buri cátei le badúgübei lun bíderaguniña gudémetiña. ⁵ Oúnajabá lubeíti wügúriña ubúругu Jópe lun joúguni Simón, le gíñe gíribei Pédro, lun liábin bun. ⁶ Lúbiñe Simón le aráansejabei úraü, le gábanbei láru barána.

⁷ Dan le ñúdünjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdaara ligía, ában wügúri derégeguati lúngua lun Búngiu, leménigira Cornélio. ⁸ Ába labájüda-guni sun cátei joun, ába loúnajaniña ubúругu Jópe.

⁹ Larúgan amídirugu, sun ayárafadeina jamá wügúriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu. ¹⁰ Weírijaliti liláma óra ligía, busénjali leígin. Dan le añája lan aráanserei leígin, ába lasáliragun ában cátei lun ítara. ¹¹ aríja lumúti lánjunrenchun siélu, ába tiábin ában cátoun camá jamuga gamísa weírítu gürágu lueígiñe gádürü tarígei, tiábin arárireina múarugun. ¹² Tídan gamísa tugúya, ñíñanu sun jawúyeri anímaalu, gádürügua tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

¹⁴ Ába loúnabun Pédro.

—Uá, Nabúreme, meígiñajágidina ni cáta le wanúgübei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdü Búngiu, maríñagabá luágu luágu mabuídun lan.

¹⁶ Úrüwañein weíyaasu lasúseredun cátei le, lárigiñe, ábaya tamúdeirun gamísa tugúya siélun. ¹⁷ Súnti ní-ján lan Pédro láu luweírín aríttaguni luágu, asáminara ca lan laníchigubei cátei le laríjubei, ligía jachúlürün luwügüriñan Cornélio, álügüdajeína tuágu lúban Simón. ¹⁸ Dan jachúlürün tubéneri múna, ába jálügüdajan rein ánjein ñí lubei lagánawa ában gírítí Simón le gíñe únbei

jaríñaga Pédro. ¹⁹ Queíti buga nijágua lan Pédro asáminara luágu cátei le asáliragubei lun, ába laríñagun Sífiri Sándu lun.

—Añája úrúwa wügúriña álugabu, ²⁰ raríba, oúfudabá, beíba jáma láu affíneni ladúga áu lan oúnajabalíña.

²¹ Ábati larárirun Pédro le ñíjin jabeí wügúriña ja loúnajabaña Cornélio, ába laríñagun joun.

—Áu le jáluajabei. ¿Ca gabúgürübalün?

²² Ába jaríñagun.

—Louñajan gumándan le gíribei Cornélio wagía, ában wügúri surúti, derégeguati lúngua lun Búngiu, jínsiñeti joun sun juríu. Ñúbinti ában ánjeli aríñaga lun lun loúnajan oúgabu lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñi áriebu ligía. Larúgan, ába lídin Pédro jáma, ñúdüntiña gíñe jádaangiñe affíñetiña ja aganoúbaña Jópe jáma.

²⁴ Larúgan, ligía jachúlürün Cesaréa, le ñí lubei Cornélio agúrabajaña jáu lidújeñu jáma jabuídun-ágei lumádagu ja lamísurajabaña. ²⁵ Dan lachúlürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesei. ²⁶ Ába liñúraguni Pédro, ába laríñagun lun.

—Ráramabá, wügúri giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi. ²⁸ Ábati laríñagun Pédro joun.

—Subúsi jumúti luágu mája lan waffínen wagía juríu lun jóundaragun juríu jáma ja mámabaña juríu quei jugúya, ni lun webélurun tídon jában lueí wasárirun mabuídunga ligíbugiñe Búngiu. Wel, arúfuda láali Búngiu nun luágu mabúseerun lan lun nouseruniña ja mámabaña

juríu queísi güρίgia mabuíduntiña. ²⁹ Ligía nánjanrunbei niábin dan le boúnajanbei nuágu. Buséntina jamúgati nasúbudiruni ca lan lébubei jóúnajan nuágu.

³⁰ Ábati loúnabun Cornélio.

—Úrüwa wéyu guetó, queíburi óra le, ñáñadina núbiñe ayúmuragua lun Búngiu ladaúrün úrüwa rábounwéyu, queísi wéchun, ligía lasálriragun ában wügúri nun táu ában dáüguaü mirítu. ³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badúgübei lun bíderaguniña gudémetiña. ³² Oúnajabá lubeíti wügúriña ubúruгу Jópe oúgei Simón le gíñe gíríbei Pédro, lúbiñe ábanya Simón aráansejati úraü, le gábanbei láru barána, ñi lagánawa.” ³³ Ába lubeíti noúnajan oúgabú furése, áni buítiti badúga bíábin. Guetóti awánja sun wagía ya ligíbugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanúgüniña Búngiu sun güρίgia. ³⁵ Resíbirügü lumútiña sun ja inébejabúbaña lun áni adúga jameí le buídubei, dándu juríu quei ja mámabaña juríu. ³⁶ Adímurejati Búngiu joun ladúgawagun Israél, adímurejeina ugánu luáguti gayára lan jaráandarun güρίgia luma Búngiu lídaangiñe Jesucrístu, le Jabúremebei sun güρίgia. ³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárígiñe lapúrichijan Juan, áni abásteragüdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsú Nazarétna, luágu meja gíñe ladáagun buíti, luma lareídaguagüdüniña ja

asúfurirubaña lábugiñe lubáfu Máfia. Ladúgünbalin buri meja cátei le, ladúga ññein lan Búngiu lúma. ³⁹ Wagía geféentiwa luágu sun cátei le ladúgübei Jesúsu Jerusalén lúma lídan sun líbiri jageíra juríu. Lá-rigiñe, ába jáfaruni jilágubei láu jádaraguní luágu ában gurúwa. ⁴⁰ Sarágüda lumúti Búngiu lídaangiñe ouweni luágu lúruíwan wéyu, ába larúfudaguágüdüni lúngua wín-waŋu woun. ⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe ouweni. Jouítiwa lúma, gurá wagía lúma lárigiñe lásaarun lídaangiñe ouweni lúnya labágaridun. ⁴² Ába louñajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsu méme le lun lagúseragüdüniña ja wínwangiñabaña jáma ja jiláguaañábaña dánme le lagíribudun ubouágun. ⁴³ Adímurejaaña meja giñe sun profétagu luágu Jesúsu lúmagiñe binárü, luágu sun lan ja afñeña luágu, resíbi jamáni ferúdun luágu jafígoun.

Jerésibiruni ja mámabaña juríu Sífiri Sándu

⁴⁴ Ñígili Pédro adímureja, ligía liábin Sífiri Sándu já-doun ja agáambabajabalin ladímurejan. ⁴⁵ Játi juríu ja afñetiña luágu Jesucrístu ja ñúbinbaña úara lúma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu. ⁴⁷ Ábati laríñagun Pédro.

—¿Majouábei funági lun jabásterún gürígia ja, quei resíbi jamáli lubeí Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun tilana liglisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri affñetiña ja Judéabaña luágu ánjaaña lan gíñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagíribudun Pédro Jerusaléoun, ába jachúrajani juríu ja affñetiña, ³ jariñaga.

—¿Cámesan bídin aríjaña ja mámabaña juríu, áni jou amúrü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúruguñadina Jópe, ayúmuragua lun Búngiu, ligía naríjin ában cátei lasálriragun nun camá jamuga ában gamísa weírítu tarárirun siélugiñe, gürágu lueígiñe gádürü tarígei, tiábin chülú le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, jóubei.”

⁸ Ába naríñagun. “Uá, Nabúreme, ladúga meígiñajágidina ni cáta le wanúgübei quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdün Búngiu, maríñagabá luágu luágu mabuídun lan.” ¹⁰ Úrüwañein weíyaasu lasúseredun cátei le, lárigiñe, ábaya tamúdeirun siélun. ¹¹ Lídan óra ligía, ligía jachúlürün úrüwa wügúriña tídoun múna to ñí nubei, óunajóutiña Cesaréagiñe álu-gana. ¹² Ába laríñagun Sífiri Sándu nun lun nídin jáma láu affñeni. Núdüntiñá giñe sísi affñetiña ja núma. Dan wachúlürün Cesaréa, ába webélurun sun wagía lúbiñoun

ában wügúri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügúriña lun jóudin ubúругu Jópe ougei Simón le gíñe gíríbei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun queí meja liábin wádoun furúmiñe. ¹⁶ Ábati narítangun luágu lé meja laríñagunbei Wabúreme. “In-árüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.” ¹⁷ Ánjeinti ru lubálin Búngiu líbe le líchubei woun, wagía le affíñeelíbei luágu Jesucrístu, joun, ¿cátanañadináti lun neréderubei lan le labúseerubei Búngiu ladúga?

¹⁸ Dánti le jagáambuni affíñetiña ja Jerusalénbaña cátei le, ába jámanichun. Ába jadímurejan luágu luweírigun Búngiu, ába jaríñagun.

—¡Rújali lubeí giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin íbágari magúmuchaditi!

Ligílisi to Antioquía

¹⁹ Dan le láfarúnbei Estéban, ába gíñe jagúmeserun eíbaajaña ja jíbiri affíñetiña, ába janúrajan jíbiri chülú Fenícia, Chíppe, luma Antioquía. Ñi jíchigei ugánu luáguti lasálbaruniña Jesucrístu gürígia lídaangiñe jafígoun jóun-rügü juríu, máma joun ámu gürígia. ²⁰ Ánjeinti affíñetiña ja Chíprena jáma Cirénena, ába jachúlürün Antioquía, ába gíñe jadímurejan joun ja mámabaña juríu, ába jíchuguni ugánu luáguti Wabúreme Jesucrístu joun lun jasálbarun. ²¹ Níñein lubáfu Búngiu jáma affíñetiña jagía, sarágu ja mámabaña juríu, ába jígiruni binádu jafíñen, ába jafíñerun luágu Jesucrístu.

²² Dan lachúlürünbei ugánu le lábun jagáambun affñetiña ja Jerusalénbaña, ába jounajani Bernabé Antioquíoun. ²³ Dan lachúlürünbei Bernabé, ába laríjini luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña súngebui lun jafálaruni Wabúreme Búngiu táu sun janígi. ²⁴ Bernabé, ában meja wügúri buíti, derégeguati lúngua lun Sífiri Sándu le gumúti, buin líña gíñe láu affñeni luágu Jesucrístu, ítara líña lagáñeirun sarágu gürígia lun Jesucrístu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanúgüni Antioquíoun. ²⁶ Ába jeréderun ñi jáma tílana liglísi ában irúmu, arúfudaja joun sarágu gürígia. Ñí Antioquía lagúarúa joun affñetiña “Cristiánugu” furúmiñe.

²⁷ Lídan dan ligía, ába jóúdingua já buri profétagu Jerusaléngiñe lun Antioquíoun. ²⁸ Ában jádaangiñe, gíríti Ágabo, ába laráramun jádan affñetiña, ába laríñagun láu le lasúbudirágüdübei Sífiri Sándu lun luágu liábiba lan ában oúnwenbun ilámaü lídan sun ubou, áni suséreti lídan lidáni larúeijan Cláudio. ²⁹ Ábati jóúndaragun affñetiña ja Antioquíana lun jóúnajan seínsu joun affñetiña ja Judéabaña según le jayáraati íchiga. ³⁰ Ítara líña jadúgüni, ába jóúnajani seínsu ligía lúma Sáulo joun tábutigu jalígilisin affñetiña Judéana.

12

Loúnwen Jacóbo lúma ladaürún Pédro

¹ Lídan dan ligía, ába lagúmeserun urúei Heródes eíbaajaña jádaangiñe affñetiña. ² Ába láfaragüdúni Jacóbo le lamúlen Juan táu efeín, ³ queíti laríjin láu gúnda jamá juríu láu cátei le, ába gíñe lanúgüni Pédro adáüra. Lídan

buri wéyu le fédu le ídaanbei teigúa fein magánatu ísi lasúsereda cátei le. ⁴ Lárigiñe lanúgüni Heródes Pédro adaúra, ába ládaruni furísunrugun jáu díisi-sísi súdaaragu oúnigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun. ⁵ Níñein lubeíti Pédro furísunrugu toúnigiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Áriebu le lubáragiñe wéyu lé yebe lúnbei laságaruni Heródes Pédro jagíbugiñoun gürígia, larúmuguña Pédro jamídaangua bián súdaara, gürágu ligía láu bián güríngüri, jámaya bián súdaara luágu béna oúnigira. ⁷ Sódini, ligía lasáliragun ában láni Wabúreme ánjeli, ába larúgoundagún furísunrugu. Ába lagúuruni ánjeli ligía louúbawagu, ába lagáguduni, ába laríñagun lun.

—Sarába furése.

Ábati láburujan güríngüri lueígiñe lújabu Pédro, ⁸ ába laríñagun ánjeli ligía lun.

—Murúbei bubélitin, daúbounme bigeídin.

Lárigiñe ladúgüni Pédro sun líra, ába laríñagun ánjeli ligía lun.

—Daúboun babíte, falábana.

⁹ Ába láfuridun Pédro lárigi ánjeli ligía, ibídiñoun lun ánjein inárüni lubeí lúmoun máma lan inárüni cátei le ladúgübei ánjeli ligía. Genégetimáati lun camá gewénediñein. ¹⁰ Ába jásügürün jáu furúmiñetiña oúnigirutiña, sügú jamaña jabáman, dánti le jachúlürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjiñuragún ában úma, ába lígiruni ánjeli ligía Pédro lábugua. ¹¹ Ligíaali lárügüdagun Pédro lúngua, ába laríñagun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma lueí sun lé yebe jabúseerubei juríu jadúgün náu.

¹² Asáminareína ligía Pédro luágu cátei le, ába lídin túbiñoun María to lúguchu Juan Márkos, le ñí jabei sarágu gürígia adámuriñu ayúmuragua lun Búngiu luágu.

¹³ Dan lacaújan luágu lubéneri bürürü, ába táfuridun ában irájü músu, gíritu Róde, aríja ca lan agúajabei.

¹⁴ Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírín tugúndan, ábarüga teíbaagun múnadoun awísaja luágu niján lan Pédro bénabu. ¹⁵ Ábati jaríñagun tun.

—¡Lúlüjaali báu!

Ába taríñagun joun luágu choúru tan luágu ligía lan. Ába jaríñagun.

—Máma ligía, fágua láfurugu.

¹⁶ Niján mémeti Pédro acaúnja luágu béna. Dan jánjunrenchuni, ába laweíridun janígi dan le jaríjini.

¹⁷ Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárígiñe, ába laríñaga joun.

—Abájüdagua jumeí cátei le lun Jacóbo lúma joun jíbiri affñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladúga ibídiñeti joun ca lan susérebei lun Pédro.

¹⁹ Ába loúnajan Heródes áluajei, quei madári jamáni, ába lálügüdaguniña súdaara já buga oúnigirubalin, lárígiñe, ába láfaraguágüdüniña jilágubei. Lárígiñe, aba láfuridun Heródes Judéagiñe, ába lídin agánawa Cesaréa.

Loúnwen Heródes

²⁰ Weíríti ligáñi Heródes jáma gürígia ja aganoúbaña Tíro lúma Sidón, ánjein jagía, ába jebélurun lídoun ában arítangun lun jounajan wügúriña lun jadímurejan lúma luágu jafúleisein. Dan le jachúlürün, ába jagáñeiruni Blásto, ában wügúri íñuguti láni Heródes, lun líder-aguniña adlíjei sun cátei, ladúga lageíragiñe Heródes jabíja eígini. ²¹ Ába lagúaragüdún Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubéi lagúmadija, ába ladímurejan joun. ²² Ábati jagúmeserun gürígia agúaraja.

—¡Máma wügúri adímurejabei, búngiu adímurejabei!

²³ Lídan óra ligía, ába lasándiragüdúni láni Búngiu ánjeli Heródes, ladúga lanáangun lúngua luágu jerérun gürígia, míchu lumúti linébase Búngiu lun, ába jeígini jéweraü, ába loúnwen.

²⁴ Abúruchagueínatimá ligíati ugánu le láni Búngiu, apúrichijóuati lídan sun fulásu.

²⁵ Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barúina jameí Juan Márcos jámagua.

13

*Jagúmeseruni Bernabé lúma Sáulo jawádigimari apúrichi-
jei Lerérun Búngiu*

¹ Tídan ligílisi to Antioquíaboun, ñíñanu profétagu jáma maésturugu. Wügúriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agúriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumeí Bernabé lúma Sáulo nun lun wadágimanu le únbei nanúadiraña.

³ Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichijan Bernabé lúma Sáulo lídan fulásu le Chípze

⁴ Ítara líña loúnajaniña Sífiri Sándu Bernabé lúma Sáulo, ába jóúdin Selúcia, ñígiñe, jádina lun jóúdin luágun uboúju le Chípze. ⁵ Dan jachúlürün lídan ubúrgu le gírubei Salamína, líbiri méme Chípze, ába jagúmeserun apúrichije lerérun Búngiu tídan jalígilisin juríu. Ñúdünti gíñe Juan Márcos jáma, íderaguaaña. ⁶ Efbuga jamúti sun uboúju ligía chülú lúmoun fulásu le gírubei Páfos. Ñi jadárira ában juríu gíruti Barjesús, garíyajati wügúri ligía, ye ligía, lariñaga luágu proféta lan. ⁷ Garíyajati ligía lumañein gumádimati le Sérjio Páulo, ában wügúri janíchiguti. Ába loúnajan gumádimati ligía luágu Bernabé lúma Sáulo ladúga busén lan lagáambuni lerérun Búngiu. ⁸ Ánjein garíyajati ligía, le méme gírubei Elímas, sigéne lumútiña lueí yebe lafíñerun gumádimati luágu le jaríñagubei lun luágu Jesucrístu. ⁹ Sáuloti, le méme gírubei Páblo, buin líña láu lubáfu Sífiri Sándu, ába lariáguni Elímas, ¹⁰ ába lariñagun lun.

—¡Yéetibu, buin bíña láu wuríbani, liraú Máfia amúrü, lágani sun le buídubei! ¿Ca uágu meréde lubei beyéejan luágu lémeri Búngiu le surúbei? ¹¹ Guetó láburuja ligáñi Búngiu buágun, berédera maríjina luágu átiri dan.

Lídan óra ligía, ába labúrigadún láu, ába láluajan cába lan árújei lújabu, ladúga maríjinjali lan. ¹² Dan

laríjini gumádimati cátei le, ába laffñerun luágu Jesucrístu, weiriti lanígi láu le jarúfudajabei luágu Wabúreme Jesucrístu.

Páblo lúma Bernabé ubúругu Antioquía

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gíríti Panfília. Ánjein Juan Márcos, ába lígiruniña, ába lagíríbudun Jerusaléoun.

¹⁴ Lárigiñe, ába jásügürün Péргеgiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídoun jalígílisin juríu, ába jañúurun ñi.

¹⁵ Lárigiñeti taliijóuniwa líburu to lánina lilúrudun Moisés túma buri líburu to jabúrújaboun profétagu, ába jóunajan ábutigu aríñaga joun.

—Wadújeñu, ánjein njein lubei dimúrei lun jaríñaguni joun gürígia ja, aríñaga jumei guetó.

¹⁶ Ábati lásaarun Páblo, ába ladúgün seíni joun láu lújabu lun jámanichun, ába laríñagun.

—Agáamba jumá, wügúriña Israelítagu júma jugúya le ájuduragubei lun Wabúngiute. ¹⁷ Búngiu le Jabúngiute

Israelítagu, anúadaja lumútiña meja binádu wagúbürigu lun lánigubaña lan, ába ladúgüniña ábanme óunwenbun násiñun dán meja le añájagua lan agánawa quei teréncha

Ejípto, lárigiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu mageírawati quei buri bián-wein irúmu.

¹⁹ Lárigiñe, ába lagúmuchaguagüdüni sédü násiñun ja aganóutiña Canaan lun líchuguni jafúlasun joun binádu wagúbürigu luára gádürü-san-dimí irúmu. ²⁰ Lárigiñe,

ába líchugun gürígia lun jagúseragüdüniña darí lúmoun lidáani proféta Samuél. ²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl

joun jarúeiteme luágu bián-wein irúmu, Saúl ligía, liraú Cis, ladúgawagun Benjamín. ²² Lárigiñe, ába lagídaruni Búngiu arúejani lueí Saúl, ába líchuguni lun Davíd, le uágubei laríñaga. “Darína Davíd, liraú Isaí, ában wügúri le áubei nagúndaara, áni ladúgübei sun le nabúseerubei.” ²³ Jádaangiñe ladúgawagun Davíd ligía liábin Jesúsu le loúnajabei Búngiu lun jasálbarun Israelítagu, queí meja laríñaguni. ²⁴ Lubáragiñebei liábin Jesúsu uboúagun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame. ²⁵ Dan le layárafadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loúbagiñe, madúnatina ni íbini lun nafáragadunun ligeídin.”

²⁶ ‘Nidújeñu, jugúya le jarájüñübei ladúgawagun Abrahám, júma jugúya le mámabei ladúgawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle. ²⁷ Já meja gürígia ja aganoúbaña Jerusalén jáu sun jábutigu, ibídiñetí yébe joun ca lan Jesúsubei, úa ligía gunfaráanda jamáni jerérun profétagu, láu sun aliijoúa lan jerérun tídan jalígilisin ságü luwéyuri eméraaguni, jagía guánarügüti gúnfuli jamúti le bürúwañubei láu jasiádiruni Jesúsu lun loúnwen. ²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun láfaragüdúni jilágubei. ²⁹ Dánti le adúga jamáli sun le tariñagubei Lerérun Búngiu luágu, ába jarárigüdúni lueígiñe gurúwa, ába jíchuguni lídoun lumúaja. ³⁰ Ába lásaaragüdúni Búngiu lídaangiñe oúweni lúnya labágaridun. ³¹ Arúfudaguati Jesúsu lúngua wínwañu luágu sarágu weíyaasu joun

ja ñúbinbaña lúma luágu luweíyasun Galiléagiñe lun Jerusaléoun, jagíati geféenbaña luágu joun gürígia guetó.

³² ‘Wíchiguñein lubeíti ugánu le jun, luágu darádu lé meja ladúgübei Búngiu jáma binádu wagúbürigu ³³ gúnfuli láali woun, wagía le jadúgawagun, láu lásaaragüdüni Jesúsu, quei laríñaguni tídan lilíburun, lídan libíaman Sálmo. “Niraú amürü, rúnaali ubáraü le bun ugúñe.” ³⁴ Aríñaga láali meja Búngiu luágu lásaaragüdüni Jesúsu lídaangiñe oúweni lun mañáladun lan lúgubu, dan laríñagun tídan líburu to Lerérun. “Níchugubei abíniruni le uágubei naríñaga lun David bun, gayáraati beménigidun luágu.” ³⁵ Laríñaga gíñe David lídan ábanya Sálmo. “Mígirunbadibu lun lañáladun lúgubu Biraú le jínsiñebei bun.” ³⁶ David, seríwiti méja joun ja lánina lidáani quei laríñaguni Búngiu lun, larígiñe, ába louñwen, ába labunún le ñí lubei jabunúa lagúbürigu, ába lañáladun lúgubu. ³⁷ Ánjeinti Jesúsu, sarágüda lumúti Búngiu lídaangiñe oúweni, mañáladunti lúgubu. ³⁸ Nidújeñu, lúnti lubeíti jasúbudiruni luágu lídaangiñe lan Jesúsu ferúdunawa lan wafígoun. Ligía ugánu wanúgübei jun. ³⁹ Lídaangiñeti gíñe, chibáwaali lubeí sun wafígoun, sun wagía le affíñebei luágu, gidáwa ligía wadúnrun ligíbugiñe Búngiu, cátei lé meja siñá lubei lilúrudun Moisés adúga. ⁴⁰ Tóunigi jumá lubeíti lueí láburujan ligáñi Búngiu juágoun queísi jaríñaguni profétagu dan le jaríñagunbei.

⁴¹ Jugúya le éjerajabei náu, weírilá janígi, áni gumúgua jumá,

ladúga áu le Búngiubei, nadúgüba cátei weínamuburiti, daríme lun mafíñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímurejan joun luágu buri cátei le lewéñegua dimáasu. ⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu jafíñen lun jafálaruni jafíñen juríu, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jaríñagun joun lun jasígirun eménigira luágu lareídun Búngiu.

⁴⁴ Lewéñegua dimáasu, le luwéyuri eméraaguni, ába jóundaragun jíbe-ágei lílana fulásu lun jagáambuni lerérun Búngiu. ⁴⁵ Láu jaríjin juríu sarágu gürígia agáambajei lerérun Búngiu, ába jeméendüjan, ába jagúmeserun asígenerei Páblo, anába jameí líri Jesúsu. ⁴⁶ Ábati jadímurejan Páblo lúma Bernabé manúfudeiga, ába jaríñagun.

—Lúnti yebe wíchuguni ugánu lúmagiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madúna jumáni ibágari le magúmuchaditi, ítara líña wešbugagubeíti apúrichija joun ja mámabaña juríu. ⁴⁷ Ladúga ítara líña laríñaguni Wabúreme woun.

Níchuguñadibu lun bíchuguni larúgounga joun ja mámabaña juríu,

lun gayáraabei lan jasálbarun ja aganoubaña lídan lagúmujouñ fulásu ubouágu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafíñerun sun ja lúnbaña jafíñerun luágu Jesucrístu, ja lúntiñabaña ibágari le magúmuchaditi. ⁴⁹ Ítara líña lapúrichijouñ lerérun Búngiu lídan sun

fulásu ligía. ⁵⁰ Ába jadímurejan juríu jáma würiña gún-fulitiña, inébewa jagía, lúma jáma wügüriña weírigutiña ñi ubúru, ába jínchajániña lun jeíbaajaniña Páblo lúma Bernabé darí lun jabúguniña lídaangiñe fulásu ligía. ⁵¹ Ábati jáfuruduní calíqui lueígiñe jagúdi, arúfudei luágu mabuídun lan jóuserun lílana fulásu ligía, ába jóúdin ubúrugun Icónio. ⁵² Gúndaañu jáña afíñetiña Antioquia luágu jabágari lúma Crístu, weíriti jederegeragun jóungua lun Sífiri Sándu.

14

Páblo lúma Bernabé ubúru Icónio

¹ Ába jebélurun Páblo lúma Bernabé tídoun jalígilisin juríu ubúru Icónio, ába japúrichijan, buíti jadímurejan darí lun jafíñerun sarágu, dándu juríu quei máma juríu, luágu Jesucrístu. ² Juríu ja mafíñebaña luágu Jesucrístu, ába jínchajaniña ja mámabaña juríu, amísiñedagúdaña afíñetiña joun. ³ Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru. ⁴ Fánreinguañu jáña lílana ubúru ligía, jíbiri jámagiñeñanu juríu, jíbiri jámagiñe apóstolugu. ⁵ Játi juríu jáma ja mámabaña juríu, ába jebélurun lídoun ában arítaguni jáma gumádimatiña lun jeíbaajaniña apóstolugu lúma lun jachámuragun dúbü jawágun. ⁶ Ánjein Páblo lúma Bernabé, ába jasándiruni, ába jóúdin lídoun buri fulásu le gíribei Lístra lúma Dérbe, biáma fulásu le láni méme fulásu le Licaónia, lúma geyégua láu, ⁷ apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dübü luágu Páblo lídan fulásu le Lístra

⁸ Ñíñein ában wügúri meľbugunti, Lístra, ñnun líña ladúga ítaragubeíñein lan lúmagiñe lagúriajóun, meľbugubeíti. ⁹ Lagáambajañein wügúri ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügúri ligía luágu gayára lan lareídagun. ¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügúri ligía arárama, ába lagúmeserun eľbuga. ¹¹ Dan jaríjini gürígia cátei le ladúgübei Páblo, ába jagúmeserun agúaraja lídan jerérun Licaóniana, jaríñaga.

—¡Raríjaña búngiugu quei jagáburi wügúriña wámoun!

¹² Jaríñaga luágu Bernabé búngiu Júpiter, luágu Páblo búngiu Mercúrio, ladúga ligía lan adímurejabei. Nújein lúban jabúngiute Júpiter bougudiñoun luef ubúruyu, ¹³ ába liábin lufádirin Júpiter ñígiñe barúina wügúriña bágasu lúma buri fulúri luágun lubéneri ubúruyu, busénti yebéti ligía jáma buri gürígia lun jáfaruniña bágasu jagía lun jadágaragüdún joun Páblo lúma Bernabé. ¹⁴ Dan jasúbudiruni Páblo lúma Bernabé cátei lan jabúseerunbei gürígia ja jadúgün, ába jajeíridagunun janáangun le luweírin lubéresen cátei le joun, ába jádaragun jóungua jádoun gürígia agúarajeina.

¹⁵ —¡Wügúriña! ¿cámesan jabúseera jadúgüni cátei le? Wügúriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wínwanbei, le adúgübalin siélu lúma ubou, barána lúma sun cátei le lídaanbei. ¹⁶ Lídan meja dan le sügújalibei, ígira lumútiña meja Búngiu gürígia lun jadúgüni le jabúseerubei, ¹⁷ láu sun, arúfuda láani joun

gürígia cáteiñein lan láuja buídu le ladúgübei joun. Rúti júya woun lúma alúbajani buíti, ru ligía eígini buídurügüti woun, belúgüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürígia lueí jáfaruniña bágasu jagía lun jadágaragüdún joun.

¹⁹ Ábati jachúlürün juríu Antioquíagiñe lúma Icóniogiñe, ába jagáñeiruni jarítangun gürígia lun jachámurangun dúbü luágun Páblo. Lárigiñe, ába jadúruguduní bougudín lueí fulásu, sun jaríñangun luágu jiláali lan. ²⁰ Dan le jagúriridágun afíñetiña láu Páblo, ába lásaarun, ábaya lebélorun fulásurugún. Larúgan, ligía lídin lúma Bernabé ubúrugin Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñi jabei sarágu gürígia afíñerutiña luágu Jesucrístu, ába jagíríbudun, ába jóúdin Lístra, Icónio lúma Antioquía. ²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webélorun lídoun larúeijan Búngiu. ²³ Rútiña gíñe ábutigu lídan cáda jadámurin afíñetiña. Lásunti jayúmurangun lúma jayúnarun, ába jedéregeruniña lábun laríaajan Búngiu le uágubei jafíñera.

Lagíríbudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachúlürün Panfília. ²⁵ Ába japúrichijaní ugánu luáguti Jesucrístu ubúrugu Péрге, líbiri méme Panfília, ábati jóúdin Atálioun. ²⁶ Ñígiñe jádina, ában jóúdin Antioquíoun, le fulásu le ñíjin lubeí jóúnajoua lábugiñe laríaajan Búngiu adúgei wadágimanu le jagúmuchubei guetó.

²⁷ Dan jachúlürün Antioquía, ába jóundaraguniña tánigu jalígílisin afíñetiña, ába jabájüdaguní sun cátei le ladúgübei Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafíñerun luágu Jesucrístu lun jasálbarun. ²⁸ Ába jeréderun Páblo lúma Bernabé sarágu dan jáma afíñetiña ñi.

15

Adámuridagúni Jerusalén

¹ Ligía jayábin wügúriña Judéagiñe lun Antioquíoun, ába jagúmeserun arúfudaja joun afíñetiña luágu lun lan jasálbarún, mósu lan jerésibiruni wügúriña circuncisión, quei laríñaguni lilúrudun Moisés. ² Barúti Páblo lúma Bernabé ában sigénei weíríti jáma luágu cátei ligía, lagúmujoún óra, ába loúnajoún Páblo, Bernabé, jámaya ámu wügúriña Jerusaléoun lun jóúdin aráanserei cátei le jáma apóstolugu jáma tábutigu ligílisi to ñíbound.

³ Ja tánigu ligílisi to Antioquíaboutoun oúnajabaliña, lídaanti jaweíyasun, ába jásügürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafíñen lun jafálaruni Crístu. Ába jagúndaaragun sun afíñetiña láu ugánu le.

⁴ Dan jachúlürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adúga láalibei Búngiu jádaangiñe. ⁵ Níñanu jádaangiñe jádámurin fariséogu ja afíñetiña luágu Crístu, ába jaráramun, ába jaríñagun.

—Lúnti jerésibiruni wügúriña afíñetiña ja mámabaña juríu circuncisión, lúnti gíñe jagúnfulirun lúma lilúrudun Moisés.

⁶ Ábati jóundaragun apóstolugu jáma tábutigu ligílisi lun jatúriajaní cátei le. ⁷ Lárigiñe sarágu dimúrei, ába lásaarun Pédro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun gíñe gayáraabei lan jafíñerun luágu Jesucrístu. ⁸ Búngiuti, le subúdijabúbei tun anígi, arúfuda lumúti luágu resíbi láníña ja mámabaña juríu láu líchuguni Sífiri Sándu joun quei líchuguni woun. ⁹ Manúgün lumútiwa Búngiu ámu jaweí, jarúmagüda lumútu gíñe janígi láu jafíñen luágu Jesucrístu. ¹⁰ ¿Cáti uágu laloúguada jafíñen guetó luágu le adúga láalibei Búngiu, ru jugúya ában ijúrúgu jawágun afíñetiña ja, le wásiñerubei wagía guánarügü anúga—ni wagía ni binádu wagúbürigu? ¹¹ Afíñetiwa luágu sálbaadiwa lan láurügü wafíñerun luágu Jesucrístu, madúgünga wagía ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña gíñe jasálbarun ja mámabaña juríu.

¹² Ábati jámanichúnga, ába jagáambuni sun le jaríñagubei Bernabé lúma Páblo joun luágu buri seíni lúma miláguru le ladúgübei Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába laríñagun Jacóbo.

—Nidújeñu, agáamba jumána. ¹⁴ Abájjudaguaali Simón Pédro woun ída líña lan fuleísei láníña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabúrújabei profétagu tídan Lerérun Búngiu.

¹⁶ Gumúguaali jarúeijan ladúgawagun Davíd, queísigubeirügü tagúmuchagun ában múna eíguadutu.

Lachúlürüba wéyu nun, áu le Búngiu, lúnyame naríjin jawágun ladúgawagun Davíd, ábame níchuguni ubáfu lun ában jádaangiñe lun larúeijan jádan.

¹⁷ Nadúgübei líra lun gayáraabei lan jayábin sun jíbiri güriǵia lun jáluajanina queísi Jabúreme, lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ ‘Ligía naríñagunbei luágu moun láni wíchugun sarágu lúruđu jawágun ja mámabaña juríu, ja ígirubalín binádu jafíñen lun jafálaruni Búngiu, ²⁰ buídurügüti láu labúrüjóun joun lun jebé lan jeígin eígin le adágarawagüdüti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigíwarügütiña lugúndun máfuridunti játa jádaangiñe, meígin jagíame játa anímaalu.

²¹ Buíti lun jagúnfulirun lúma buri cátei le lun jíchugun inébesei joun juríu, ladúga lúmagiñe bugája binádu dan, añájein güriǵia apúrichijati lilúrudun Moisés lídan ságü fulásu, alijóuati lúruđu luágu tídan buri jalígilisin juríu ságü luwéyuri eméraaguni.

²² Ábati jarítangun apóstolugu jáma tábutigu ligílisi jáma sun tílana ligílisi janúadajan wügúriña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le gíríbei Barsabási, lúma Sílas, bián wügúriña weírigutiña jádan affñetiña. ²³ Ába jóunajan ában gárada jáma, láriñajare tídan gárada tugúya.

“Wagía le apóstolugu, tábutigu ligílisi, jáma sun jíbiri affñetiña, mábuga wáña joun wadújeñu lueígiñe Jesucristu ja mámabaña juríu ja aganoúbaña Antioquía, Síria, lúma Cilfcia. ²⁴ Agáambaadiwa luágu añájein lan gürígia ñúdüntiña yágiñe ibídiñoun woun ebéreseja jun láu jadímurejan, áni dájaña ámu arítaguni jídoun láu jaríñagun jun luágu mósu lan jerésibiruni wügúriña circuncisión, queísi laríñaguni lilúrudun Moisés. ²⁵ Ligía wúwaradúnbei lídan warítagun lun wanúadajan gürígia wadaangiñe lun jóudin aríjaün úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalíbei jabágari lídoun pelíguru lueígiñe Wabúreme Jesucristu. ²⁷ Woúnajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to woúnajaboun jun, jun. ²⁸ Maríbaanti larijín lun Sífiri Sándu lúma woun, míchugúniwa lan ámu ijúrúgu jun lueídügüya murúsun cátei le, le lunbei jadúgüni. ²⁹ lun meígin jumá úwi le jáni anímaalú ja adágarawagüdútiña joun sándu, meígin jugúyame jítaü, ni úwi le jáni anímaalú ja tigiwarügütiña, madáagun jugúyame cátei buri jama gürígia ja mamárieidúntiña júma. Ánjaün areídagua júngua lueí buri cátei le, buídubei jadúga. Buídu lámuga lídin jun.”

³⁰ Lárigiñeti jóunajoún luágu jaweíyasun, ába jóudin Antioquía. Dan le jachúlürünbei ñi, ába jóundaraguniña affñetiña, ába jíchugunun gárada joun. ³¹ Dánti le jalíjanbarun affñetiña, ába jagúndaarun sarágu luágu gurásu le tíchugubei joun. ³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun affñetiña láu jadímurejan joun, ru jagía idérebugu lun jafíñen. ³³ Lárigiñe jásügürün átiri dan ñi, ába jayóuragun affñetiña joun lubá jagíribudun

jámoun já meja oúnajabaliña Jerusalén. ³⁴ Ánjeinti Sílas, ába leréderun. ³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichijei ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába laríñagun Páblo lun Bernabé.

—Queímounya aríjaña afíñetiña lídan sun ubúругu buri le ní lubei apúrichija wamáali lan ugánu luágu Crístu, aríja wamámuga ída jáña lan.

³⁷ Busénti yebe Bernabé janúgüni Juan Márcos jámagua, ³⁸ májati Páblo janúgüni ladúga meja ígira láaña lan Panfília, masígiti jáma lídan wadágimanu. ³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanúgüni Bernabé Márcos, ába jóudin Chípree, ⁴⁰ ába lanúgüni Páblo Sílas. Lárigiñe jederegeruni afíñetiña Páblo lúma Sílas lújaburugun Búngiu, ába jóudin, ⁴¹ ába jásügürün Síriagiñe lúma Cilíciagiñe, íchaajeina gurásu joun afíñetiña ligílisirugu.

16

Lídin Timoteo úara jáma Páblo lúma Sílas

¹ Ába jachúlürün Páblo lúma Sílas lídoun buri fulásu le Dérbe lúma Lístra, le ní lubei jadárira ában afíñeti grítiti Timotéo, tiraú ában wúri juríu afíñetu luágu Jesucrístu, güriégu lúguchi. ² Afíñetiña ja aganoubaña Lístra lúma Icónio, buíti jadímurejan luágu. ³ Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun juríu ja aganoubaña lídan buri fulásu ligía, quei subúdi jamáni luágu merésibirun láani circuncisión ladúga güriégu lan lúguchi. ⁴ Súnti fulásu le nígiñe

lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun afíñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdún tílana ligílisi lídan jafíñen, ába jagánwoundun afíñetiña ságü wéyu.

Lasálriragun ában wügúri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia, ⁷ ába jachúlürün luágu fadáguau le Mísia. Nígiñe yebe jarítagua lun jebélurun loúbawagun Bitínia, májati láni Jesúsu Espíritu le méme Sífiri Sándu lun jadúgüni. ⁸ Ábati jóúdin surúrugú Mísioun, ába jarárirun Tróas. ⁹ Ñi lasálriragua ában wügúri Macedóniana lun Páblo, áriebu, rára ayúmuraagua lun, laríñaga lun. “Queímoun Macedónia íderagua bámugawa.” ¹⁰ Lárigiñe lasálriragun wügúri ligía lun Páblo, ába waráansejan lun wóúdin Macedónia láu wafíñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Sílas ubúrugú Filípos

¹¹ Ábati wáfayarun Tróasgiñe, ába wóúdin sügúlügü luágun ubóuju le Samotrácia, larúgan, ligía wachúlürün Neápolis. ¹² Nígiñe ába wóúdin Filípos, Filípos lábugiñeñein lagúmadijan Róma, ligía gíñe ubúrugú le weírigutimáabei luágu loúba Macedónia. Reídeitiwa átiri wéyu ñi. ¹³ Luágu ában wéyu le luwéyuri eméraaguni, ába wáfuridun boúgudin lueí ubúrugú, lárún dúna, lídan ában fulásu le ñi lubeíja layúmuraawagúa lun Búngiu. Ába wañúurun ñi, ába wíchuguni ugánu luáguti Crístu joun wúríña ja oúndaragubáña ñi. ¹⁴ Níñoun ában jádaangiñe, gíritu Lídía, ubúruguna Tiatíra, tifisiute alúguraja

gamísa fínutu to gúchu tágu. Judúguatu wúri tugúya lun Búngiu, tagáambajañádiwa, ába lánjunrenchunun Búngiu tanígi lun tadúgün gásu láu le laríñagubei Páblo.
¹⁵ Ába tabásterun jáu sun tílana túban, lárigiñe, ába tayúmuragun woun ítara.

—Ánjein afíñe jubeí luágu afíñe nan le tímatimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

¹⁶ Luágu ában dan, dan le woúdiña lan lídoun fulásu le ñi lubeíñaja layúmurawagúa lun Búngiu, ába wadúnragun túma ában irájü gawágutu ában espíritu wuríbati le íchugubei ubáfu tun lun tasábiujan. Ában idámuni irájü tugúya, ibíjatutíja sarágu seínsu joun tabúriña láu tasábiujan. ¹⁷ Ába tagúmeserun irájü to afálarawa, wagía lúma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu úma lánina asálbaruni lídaangiñe figoú jun.

¹⁸ Gíbeti wéyu táu adúgei cátei le darí lun tebéresedun lun Páblo, ába lagáragun, ába laríñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáali lan jagáñeirun seínsu tueígiñe, ába járügüdüni Páblo lúma Sílas, ába janúgüniña jagíbugiñoún ábutigu lamídaangua ubúругu.

²⁰ Ába jarúfuduniña jagíbugiñe gumádimatiña, ába jaríñagun.

—Wügúriña juríu ja, jachágaraguñein wabúrugute,
²¹ jarúfudajaña igáburi le wásiñerubei erésibira ni adúga
 ladúga Rómata wagía.

²² Ábati jiñúragun gürígia jóungua jawágu, ába jará-
 gachaguágüdüniña gumádimatiña, ába jíchugun dimúrei
 lun jabeichúniwa láu wéwe. ²³ Lárigiñe sarágu abeichúni,
 ába jádaruniña furísunrugún, ába jaríñagun lun oúni-
 giruti adaürútiña lun goúnigi lániña buídu. ²⁴ Dan libíjini
 oúnigiruti lúrudu le, ába ládaruniña lídoun lagúmujoún
 tarígeirugu furísun, ába legélenchuni jagúdi.

²⁵ Queí buri luágun amídi áriebu, ññanu Páblo lúma
 Sílas ayúmuragua lúma erémuja urému lun Búngiu,
 ja jíbiri, agáambaja. ²⁶ Sódini, ába liábin ában oún-
 wenbun járabaganáli, ába lánjingichuni tuágaburi furí-
 sun. Lídan óra ligía, ába lánjunrenchun sun béna, safá
 ligía sun güríngüri le jawágubei adaürútiña. ²⁷ Ába
 lagágudun oúnigiruti, dan laríjin luágu júnren líña lan
 sun tubéneri furísun, ába laságarunun lefeínte lún yebe
 láfaragun lúngua, sún yebe laríñagun luágu ñúdúngua
 jamá adaürútiña. ²⁸ Ába lagúaragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebélorun
 eíbaagueina, adádagareina láu anúfudei, ába láguragun
 lúngua lubádu jagúdi Páblo lúma Sílas. ³⁰ Ába lasá-
 garuniña furísunrugugiñe, ába laríñagun joun.

—Wügúriña, ¿ca cátei lúnbei nadúgüni lun nasálbarun?

³¹ Ába jaríñagun lun.

—Affíñebá luágu Wabúreme Jesucrístu, ábame basál-
 barun jáu sun tílana búban.

³² Ába jíchuguni ugánu luáguti Crístu lun jáu sun ja
 lúbiñebaña. ³³ Lídan méme óra ligía, láu sun áriebujali

lan buídu, ába lachíḅuni bíti buri le jawágubei, ábati labásterun jáu sun lufámilian. ³⁴Lárigiñe, ába lanúgüniña lúbiñoun, ába líchugun eígini joun, ¡máti lugúndan jáu sun lufámilian láu jafíñerun luágu Búngiu!

³⁵Larúgan bináafin, ába jóunajan gumádimatiña polisía aríñaga lun oúnigiruti lun lígiragüdúniña Páblo lúma Sílas. ³⁶Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünün, gayáraajali lubefti jídin darángilañu.

³⁷Ába laríñagun Páblo joun polisía.

—Láu sun Rómana wamá, beíjamutiwa jagíbugiñe güriḡia, míchigunga dan woun lun wadímurejan waweígiñegua, dágua jamáwa furísunrugun, ¿guetó buséntiña jígiragüdúniwa arámudaguárügü? ¡Máfuridunbadiwa! Núbin jamá aságarawa.

³⁸Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómana jamá Páblo lúma Sílas. ³⁹Ábati jóudin amúriaaja ferúduñ jama, ába jaságaruniña, ába jayúmura-gun joun lun jáfuridun ñígiñe ubúrugugiñe. ⁴⁰Dan le jáfuridunbei furísunrugugiñe, ába jóudin túbiñe Lída, lárigiñe jaríjiniña afíñetiña lúma jíchugun idérebugu joun, ába jasígiruni jaweíyasun.

17

Chagáguauü ubúruḡu Tesalónica

¹Lídan jaweíyasun Páblo lúma Sílas, süḡútiña Anfípolis-giñe lúma Apolóniagiñe, ñígiñe, ába jachúlürün ubúru-gun Tesalónica le ñí tubei ában jalígilisin jurú. ²Quei léchun Páblo, ñúdünti tídan ligílisi tugúya, adímure-jati jáma úrüwa dimáasu, ságü luwéyuri eméraaguni.

³ Arúfudajati joun quei taríñaguni Lerérun Búngiu luágu lúnti lán meja lasúfurirun Crístu, lárigiñeme lan loúnwen, aba lánme lásaarun lídaangiñe oúweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña gürígia.

⁴ Ábati jafíñerun jádaangiñe juríu, ába júaradun lúma Páblo lúma Sílas. Afíñetiña gíñe sarágu ja mámabaña juríu ja judúguatiña lun Búngiu, jáma sarágu würiña weírígutiña. ⁵ Juríu ja mafíñebaña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügúriña wuríbatiña ja eíbugaña-jádügübaña úmada, ába jachágaraguágüdúniña gürígia ñi ubúru. Ába jaságarajanun lúban Jasón, áluajaña Páblo lúma Sílas lun jaságaruniña lun jedéregeruniña jájaburugún gürígia. ⁶ Queíti madári jamániña ñi, ába janúgüni Jasón jáma átiri jádaangiñe afíñetiña jagíbugiñoún gumádimatiña lídan ubúru gu ligía, ába jagúaragun aríñaga.

—Wügúriña ja, ja ebéresejabaña lídan sun fulásu, chúlújaña gíñe ñájoun, ⁷ resíbi láaña Jáson lúbiñe. Sun jagía dürúgua jamúti lilúrudun Urúei César, ladúga aríñagatiña luágu níjein lan ámu urúei, ában nege gíríti Jesúsu.

⁸ Dan jagáambuni gumádimatiña jáma sun jíbiri gürígia cátei le, ába jachágaragun. ⁹ Jáson jáma ja jíbiri, ába jafáyeijan, ába jígirawagüdúniwa.

Páblo lúma Sílas ubúru gu Beréa

¹⁰ Furése furése, dan le labúrigadun, ába jóunajaniña afíñetiña Páblo lúma Sílas ubúrugun Beréa. Quei jachúlürün ñi, ába jóudin tídown jalígílin juríu. ¹¹ Juríu ja ñibaña, buítimaati jagáburi jaweí ja Tesalónicabaña, resíbi

jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni lubeí le aríñawagúbei joun. ¹² Sarágu jáña lubeíti affínerutiña jádaangiñe, affíne jagía gíñe sarágu ja mámabaña juríu, dándu wúríña weírigutiña quei wügúriña. ¹³ Dan le jasúbudirunbalin juríu ja Tesalónicabaña luágu lapúrichijañein lan gíñe Páblo Lerérun Búngiu Beréa, ába joudin achágaraguágüdaña gürígia ñi. ¹⁴ Ába jounajani affínetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja ñúdünbaña láu Páblo, ába jáfayajan lúma chülú ubúругu Aténas. Lárigiñe, ába jagíribudun barüña jagía dimúrei lun Sílas lúma Timotéo lun joudin lárigi Páblo lídan lufúresen.

Páblo ubúругu Aténas

¹⁶ Sun niján lan Páblo Aténas agúrabajei Sílas lúma Timotéo, medéraaguágüdünti larítangun láu laríjini ubúругu ligía buin jáu бүрүбүн sándu. ¹⁷ Ligíaja ladímurejaanbei tídan jalígilisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma gürígia ja úmadarugubaña, ñí lubei jádamuridagua. ¹⁸ Ñíñanu jádaangiñe wügúriña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan laríñagubei wügúri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñangunbeiti ítara ladúga lapúrichijan Páblo joun luágu Jesúsu lúma luágu ásaaruni lídaangiñe ouweni. ¹⁹ Ábati janúgüni lídoun ában fulásu gírítu Areópago, le

ñi lubeíja jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barú-fudajabei? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ñi, marí-taguntiña luágu ámu cátei lueídügüya luágu jaríñagun lúma jagáambun cátei iséri.

²² Ábati laráramun Páblo jamídaangua ñi Areópago, ába laríñagun.

—Wügúriña Aténasna, aríja numúti luágu afíñe jumá jawágu jisándun, ²³ ladúga dan le aríaaejina nubálin fulásu buri le ñí lubei jájuduragua joun jisándun, darítina ában latáru le ñí lubei bürúwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

²⁴ Ligía Búngiu le adúgübalin uboú lúma sun cátei le uboúagubei, ligía labúremebei siélu luma uboú. Maganoúnti tídan ligílisi to jadúga gürígia, ²⁵ memégeirun lumúti gíñe le gayáraabei jadúgüni gürígia luágu lufúlei-sein, ligía guánarügü íchugubei ibágari lúma garábali, lúma sun cátei woun, sun wagía.

²⁶ ‘Lídaangiñe ábanrügü wügúri ladúgaña sun néchaanigu lun jaganoún lídan sun fulásu, aráanseleí dan le lúnbei jabágariduni lúma fulásu le lúnbei ñíba lan jagánawa. ²⁷ Adúga lumúti Búngiu sun líra lun gayáraabei lan jáluajani gürígia, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe. ²⁸ Ladúga lídaangiñeti Búngiu awánjein lubeí, gabágari wagía, eíbuga wagía ligíbuagu uboú le, quei jaríñaguni poétagu jídaangiñe. “Lirájüñü

Búngiu wagía.” ²⁹ Queíti lirájüñü wabeí Búngiu, moún lumuti wanúgüni Búngiu quei ában sándu le gólu, o pláta o dúbü le jadúga wügúriña quei jarítangun luágu ítara líña lan Búngiu. ³⁰ Mebéresegúnti méja Búngiu láu cátei le jadúgübei gürígia lábugiñe libídiñe joun, ánjein guetó, aríñagati joun sun gürígia lídan sun fulásu lun jasáansiruni jóuserun. ³¹ Ladúga anúadajaali Búngiu ában wéyu lun ligíaba lan wéyu lagúseragüdüniña gürígia ja ubouágubaña láu ísuruni láu ában wügúri le anúadaja láalíbei, wügúri ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, ñíñanu jádaangiñe, ába jéjerajan láu, jíbiri ába jaríñangun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiruniña Páblo. ³⁴ Ába jafíñerun jádaangiñe luágu Jesucristu, ába jafálaruni. Ñíñein Dionísio jádan, lé meja ában jádaangiñe ábutigu lídan fulásu le gíríbei Areópago, túma gíñe ában wúri gírítu Dámaris, jámaya ámu gürígia.

18

Páblo ubúruгу Corínto

¹ Lárígiñe cátei le, ába láfuridun Páblo Aténasgiñe, ába lídin ubúruгу Corínto. ² Ñi ladárrira ában juríu gírítu Aquíla, túma lúmari to gíríboun Priscíla, Póntona jagía. Málügili lueígiñe jayábin Itáliagiñe, jayábinbei ñígiñe ladúga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában

lan lifísiute jáma—tadáawagun quiámpu—ába leréderun jáma lun jawádigimaridun lídan ában. ⁴ Ságüti wéyu le lidáani eméraguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucrístu.

⁵ Dan jachúlürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérun Búngiu. Aríñagati joun juríu furáangu luágu Jesúsú lan Crístubei le jagúrabajabei lun lasálbaruniña lídaangiñe jafígoun. ⁶ Ánjaña juríu, ába jasígeneruni le lubeíbei, anábagua buri jameí. Ábati láfurudunun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügúri gíríti Jústo, wügúri ligía, judúguati lun Búngiu, ñi toubagiñe ligílisi lagánawa. ⁸ Críspo, le tábuti jalígílisin juríu, ába lafíñerun luágu Wabúreme Jesucrístu, jáu sun tílana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsú, ába jafíñerun, ába jabásterún. ⁹ Ábati lasáliragun Wabúreme Jesúsú lun Páblo luágu ában árieibu, ába laríñagun lun.

—Manúfudebá, bapúrichija méme, mámanichabá, ¹⁰ ladúga anájein búma, úabei ni ában agúruruti buágu lun ladúgün wuríbani bun. Añájein sarágu gürígia lídan ubúrgu le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajei Lerérun Búngiu joun lílana fulásu.

¹² Lídan dan le Galión lan gumándanbei Acáya, ába jóúndaragun juríu lun járügüdüni Páblo. Ába janúgüni

ligíbugiñoun lúruđu lun lagúserawagüdüń. ¹³ Ába jaríña-gun lun gumáńdan.

—Wügúri le, leréde arúfudaja joun güriğia lun jájuduragun lun Búńgiu láu ában igáburi le múaraanbei lúma lúruđu.

¹⁴ Dán yebe ladímureja lan Pábło, ligía laríñagun Galión joun jurú.

—Lun jamúga ában lan wuríbanı o dúru júrüti ladúğübei wügúri le, níchaaguña jamúga núngua lun nagáambunün, jugúya jurú, ¹⁵ quei luágu lan dimúrei buri, lúma íri, lúma jilúrudun, aráanse jumeí júngua, ladúga mabúseeruntina nagúseragüdüń luágu buri cátei le.

¹⁶ Ába labúgaguniña ñígiñe. ¹⁷ Ábati járügüdüni sun güriégugu Sóstenes le tábuti jalígilisin jurú, ába jabúlei-seiruni ñi guánarügü ligíbugiñe gumáńdan. Mebére-seğünti Galión láu líra.

Lagíribudun Pábło Antioquíoun, lagúmeseruni lúruwan luweíyasun apúrichija

¹⁸ Láriğiñe líra, ába leréderun Pábło átiri dan ñi Corínto. Láriğiñe, ába layoúragun joun afñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúругu Céncrea lubáragiñe ládinun, lun lagúnfulirun láu ában méja daráđu le ladúğübei lúma Búńgiu.

¹⁹ Dan le jachúlürün ubúругu Éfeso, ába líğiruniña Pábło Priscíla lúma Aquíla lun jeréderun ñi lídan ubúругu ligía. Lubáragiñe líğiruni Pábło Éfeso, ába lídin ligílisirugu adímureja jáma jurú. ²⁰ Ába jamúriajan lúma lun leréderun méme ñi jáma, májati. ²¹ Ábati layoúragun joun, laríñaga joun.

—Mósu ñi nan Jerusalén lubá fédu le lúnbei ladügün, nagíribudayaba aríjaün ánjein busén Búngiu.

Ába ladinun, ába lídin Éfesogiñe. ²² TÜRÚTI Cesaréa, ñígiñe ába lídin Jerusalén abúsura joun tílana ligílisi, lárigiñe, ába larágachun Antioquíoun. ²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajeina dúgüdaguau joun afíñetiña.

Lapúrichijan Apólos ubúругu Éfeso

²⁴ Lídan dan ligía, ába lachúlürün ában juríu gíríti Apólos ubúругun Éfeso, Alejandría juríu ligía. Gapúrichijati, áni subúdi lumúti gíñe Lerérun Búngiu buídu buídu. ²⁵ Subúdi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun loúgua lan lasúbudirun luágu, le rügüñein larúfudajabei Juan le abásteragüdajabei luágu Jesúsu le lúnbei liábin lárigiñe, lasúbudira. ²⁶ Luágu ában wéyu, dan le ladímurejaña lan Apólos tídan jalígílisin juríu láu sarágu ichouruni, ába jagáambuni Priscíla lúma Aquíla. Dan lagúmuchun lapúrichijan, ába janúgüni Priscíla luma Aquíla jábiñoun lun jafúnraanguagüdünitima luáguti Jesúsu le Wasálbaragülebei lun, luma luáguti cátei le larúfudajabei. ²⁷ Dánti le labúseerunbei Apólos lídin loúbawagun Acáya, lúmagiñeñanu afíñetiña Éfeso lun lídin, ába jóunajan ában gárada joun afíñetiña ja ñíbaña Acáya lun jerésibiruni buídu. Dan lachúlürünbei Apólos Acáya, íderagua lumútiña ja lafíñeragüdúbaña Búngiu luágu Jesúsu, láu lareíni, ²⁸ arúfuda lumúti joun gürígia láu richaú le siñá jamuti asígenera, luágu marícha lan le jarúfudajabei juríu,

arúfudaleí joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúruğu Éfeso

¹ Sun niján lan Apólos ubúruğu Corínto, ligía lásügürün Páblo labádinaguagiñe buri fulásu, ába lachúlürün Éfeson ñi lubeí ladárrira sarágu afíñetiña. ² Ába laríñagun joun.

—¿Resíbi jumútisan Sífiri Sándu dan le jafíñerunbei luágu Jesucrístu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

⁴ Laríñaga Páblo joun.

—Labásterágüdüniña méja Juan gürígia, arúfudei luágu sáansi jamáali lan jóuserun, aríñagati gíñe joun luágu lúnti lan jafíñerun luágu le lúnbei liábin lárigiñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu. ⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe. ⁷ Jawáraañanu dúusu wügúriña jádan súngebubei.

⁸ Úrüwañein játi láu Páblo abásija tídoun jalígilisin juríu le ñi lubeíja lapúrichija, adímureja ligíaja furáangu luágu larúeijan Búngiu, afíñegüda láña gürígia luágu. ⁹ Níñianu

gíñe, edéreragüdütu janígi, májatiña jaffñerun, adímure-jarúgü jagía wuríba luágu lémeri Crístu jagíbugiñe gürí-gia. Ábati ladíreirun Páblo jaweí, ába lanúgüniña ja affñebaña luágu Jesucrístu tídoun ában lescuéla to ní lubei larúfudaja ában wügúri gíriti Tiránno, ábaja ladímurejan ságü wéyu joun, ñi. ¹⁰ Ítara líña lasígirun luágu bián irúmu, súnti ja aganoúbaña louúbawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu. ¹¹ Adúgati buríti Búngiu oúnwenbun buri miláguru lídaangiñe Páblo, ¹² darí lun tánügúniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatíña jádaangiñe.

¹³ Níñanu juríu eíbugañajádügütiña, aságajatiña gíñe espíritugu wuríbatíña jaweí gürígia, álugatiñá yebe jayú-suruni líri Wabúreme Jesúsu lun jaságajaniña, jaríñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

¹⁴ Níñanu sédü lirájüñü ában juríu gíriti Escéva, jábuti méja fádirigu, jádan ja adúgübalin buri cátei le. ¹⁵ Níjein ában jadúgüni, ába louñabuniña espíritu wuríbati ligía.

—Subúdi numúti Jesúsu, subúditi gíñe nun cátei lan Páblobei, ánjein jugúya, ¿cátaün?

¹⁶ Ába lachúragun wügúri le láubei espíritu wuríbati lúngua jawágun, gabáfuti sügú jáu súnqubei, ába labúlei-seiruniña buídu, ába jeíbaagun ñígiñe surúsu lúma láu buri bíti jawágu. ¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíriti linébedun líri Wabúreme Jesúsu joun.

¹⁸ Sarágu gíñe buri jádaangiñe ja affñerubaña, ába jayábin agúfeserei buri cátei wuríbati lé meja jadúgübei, ¹⁹ sarágu gíñe buri jádaangiñe já meja gabíñarajadibaña, ába janúgünun jalíburun buri, ába jágudunun jagíbugiñe súngubei. Dan jabájüdünbalin tebégi líburu buri tugúya, gebégitu queí buri dimí-san mílu murúsun seínsu le pláta. ²⁰ Ítara líña abúruchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburi gürí-gia.

²¹ Lárigiñe sun cátei le, ába laráanserun Páblo lun lídin aríjaña affñetiña Macedónia luma Acáya, lubá lasígiruni luweíyasun Jerusaléoun. Aríñagati gíñe luágu lárigiñe lanme lídin Jerusalén, lídiba lan gíñe Róma. ²² Ábati lou-najan biáma jádaangiñe ja íderagubalin lubá, Macedónia, wügúriña jagía, Timotéo luma Erásto, ligía, ába leréderun átiriräüya dan Ásia.

Chagáquaü ubúruğu Éfeso

²³ Lídan dan ligía, ñíñein ában oúnwenbun achágaraguní Éfeso jaweígiñeti ja afálarubalin lémeri Crístu, ²⁴ lídaangiñeti ában wügúri gíriti Demétrio, ladáawagun cátei láuti pláta lifísiutebei. Wügúri ligía, adáaguati tirájüñü ligílisi láu pláta to tilígilisin sándu to gíriboun Diána, belútiti sarágu seínsu joun ja ñadágimeinbaña lúma. ²⁵ Ábati loundaruniña ja ñadágimeinbaña lúma úara jáma ámu ja ñadágimeintiña ámu físiu le lenége jafísiute, ába laríñagun joun.

—Wügúriña, subúdi jumúti luágu ñulú lan wabágari láu físiu le, ²⁶ agáamba jumáli, aríja jumeí ída líña lan lídin Páblo aríñaga luágu máma jamá búngiugu sándu ja jadúgübaña wügúriña, áni gíbeeña gürígia jaffñer-agüdüñ, mámarügü ya Éfeso, lídan gíñe líbe-ágei Ásia.

²⁷ Ñóunguati cátei le, ladúga gayáraabei weféridiruni wabísinisín, gayáraabei gíñe teféridiruni tilígilisin búngiu Diána tuweírigun, ábame tanügún búngiu Diána to ún-boun jájuduragua sun gürígia Ásia lúma lídan sun uboú quei ni cáta.

²⁸ Dan le jagáambunbalin cátei le, ába jagáñidun buídu, ába jagúaragun.

—¡Weírigutu Diána to jabúngiute Éfesona!

²⁹ Ñíñeinti ában oúnwenbun achágaraguní lídan sun ubúругu ligía. Ába járügüdüni Gáyo lúma Aristárco, bíama wügúriña Macedóniana ja úarabaña lúma Páblo, ába jadúruguduniña chülú tuágun múna to ñi lubeíja jóúndaragua. ³⁰ Álugatí yebe Páblo lebélurun lun ladímurejan joun gürígia ñi lun ladílirun sun cátei, mígirun jamúti afíñetiña lun lebélurun. ³¹ Ñíñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélurun lan ñíjin. ³² Ñíti lídan adámurini, jíbiri agúaragua ában cátei, jíbiri agúaragua ámu, ladúga chagágujaña gürígia, jíbe-ágei, ibídiñeti joun ca lan lébubei jadámuridagun. ³³ Ñíñanu jádaangiñe gürígia, ába jafúnraanguágüdüni cátei le lun Alejandro, le jádajabei juríu ligíbugiñoún guríriguauí lun ladímurejan luágu jafúleisein. Ába ladúgün Alejandro seíni láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírigutu Diána to jabúngiute Éfesona!

³⁵ Dánti le gálumagüda láaña abúrújati le láni ubúругu ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígilisin búngiu Diána, túma tiyáwa to áburujaboun siélugiñe. ³⁶ Quei úa lan ni ában lun lasígeneruni cátei le, gáluma jumá, madúga jumá ni cáta masáminarunga jumeí buídu. ³⁷ Wügúriña ja, ja janúgübaña ñájoun, míwerujan jamágiru jilígilisin, madímurejan jagía wuríbatu tuágu jubúngiute. ³⁸ Ánjein níjein lubeí cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubeí agúseragüdüti lúma agúseragülei, gayáraati jídin ligíbugiñoun lúruđu lun ladímurejan cáda ában lueígiñegua. ³⁹ Ánjein ámu lubeí cátei jamúriajabei, lúnti laráanserún lídan ában adámurini le richáti, ⁴⁰ ladúga gayáraabei laríñawagúniwa luágu wagúbujaña lan wuríbani ladúga cátei le asúseredubei ugúñe, ibídiñebei woun cába lan wounabagüle ánjava álügüdüwa luágu chagáguau le.

⁴¹ Lárigiñe laríñaguni cátei le, ába lagúmuchiaguagüdüni adámuridaguni.

20

Luweíyasun Páblo Macedónioun lúma Grécioun

¹ Dan le lagúmuchiunbei chagáguau Éfeso, ába louúnajan Páblo jawágu affíñetiña lun jayábin lun, gayára lámuga líchugun gurásu joun, ábati louburuniña, ába layouragun joun, ába lídin Macedónioun. ² Luágu luweíyasun, chülúgueina líña jámagiñe affíñetiña lídan buri fulásu le ídaangiñebei lásügüra, ru ligía sarágu dúgüdagau joun láu lerérun. Ítara líña lachúlürün lídoun ageírau le Grécia. ³ Reídeiti úrüwa játi ñi Grécia, ládina yebe ugúnein lun lídin Síria, ligía lagáambun luágu

jelédeguña lan juríu lubá. Ábagubeíti laráanserun lun lagíríbudun múarugugiñe, sügüina ligíaya Macedóniagiñe. ⁴ Gíbetiña wügüríña ñúdüntiña úara lúma. Sópater, le liraú Pyrrhus, Beréagiñe, Aristárco lúma Segundo, Tesalónicagiñe, Gáyo, Dérbegiñe, Timotéo giñe, lúma giñe Tíquico lúma Trófimo, Ásiana. ⁵ Afíñetiña ja, ába jóudin wabá, ába jagúrabuníwa ubúruгу Tróas. ⁶ Wagía, lárígiñe fédu le teigín fein to magánaboun ísi, ába wáfuridun Filíposgiñe tídan ugúnein, seíngü wéyu lárígiñe, ligía wátürün Tróas, le ñí lubei wúwarada jáma ja ñúdünbaña wabáragiñe, ába weréderun ñi sédü wéyu.

Bisída láni Páblo ubúruгу Tróas

⁷ Samúdi gúñoun, ába jóundaragun afíñetiña lun jeígin fein le jarítaguagüle luágu louñwen Crístu, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebu. ⁸ Íñuñanu lídan lúrüwan túbanana múna to ñí lubei jóundaragua, ñíñein sarágu lámpu durúngu. ⁹ Ñíñein ában irájü agáambaja, ñun líña luágu funédere, Eútico líribei. Queíti lílúbei lapúrichijan Páblo áriebu ligía, ába ladábudun lágu irájü ligía, ába larúmugun ñi, ába leíguadun lídaangiñe lúrüwan túbanana múna, múarugun. Dan le jarárirunbei lun jiñúraguni, jiláali. ¹⁰ Ábati larárirun Páblo, ába laroúnrun ligíbuagu irájü ligía, ába louburuni. Ába laríñagun joun afíñetiña.

—Madíjeri jumá, gabágariyaali.

¹¹ Ábayati lawárirun Páblo, ába jafánreinragunun fein, ába jeígin. Ábati lasígirun adímureja darí larúgadun, ligíaali lídin. ¹² Irájüti buga ligía, ába janúgüni águyu wínwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába gíñe woúdin, ába wádinun tídoun ugúnein, ába woúdin chülú Asón, le ñí lubei lúnti lan wabúduni Páblo quei wadáradun, ladúga busén lan lídin Asón múarugugíñe. ¹⁴ Dan le wadúnragun lúma ñi Asón, ába ládinun wáma, ába woúdin Mitiléne. ¹⁵ Larúgan, ába wáfuridun ñígíñe, sügüína wagía ligíbugíñe uboúju Quío, ában wéyu lárígíñe, ligía wachúlürün uboúju Sámos. Ába weméraagun ubúругu Trojílio, larúgan, ligía wachúlürün ubúругu Miléto. ¹⁶ Mátürüntiwa ubúругu Éfeso luágu wawéiyasun ladúga mabúseerun lan Páblo leréderun sarágu dan ageíraü Ásia, busénti lachúlürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachúlürünbei, ába laríñagun joun.

—Subúdi jumúti ída líña lan nigáburi lúmagíñe furúmiñeti wéyu nachúlürün Ásioun. ¹⁹ Sun dan le jagánaguañadina lubeí, seríwitina lun Búngiu láu únabuni, láu sarágu águiraü, súfuri áu sarágu láu cátei lé buri jabúseerubei juríu jadúgün nun. ²⁰ Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguau lúma júbiñe. ²¹ Dándu joun juríu quei joun ja mámabaña juríu, aríñagaadina luágu lúnti lan jasáansiruní jóuserun ligíbugíñe Búngiu, lúma lun jafíñerun luágu Wabúreme Jesucrístu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³ lé rügúñein nasúbudirubei, luágu sun lan ubúругu le ñí lumuti nídin, aríñagati Sífiri Sándu nun luágu

nadaürüba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebéresera, ni nibágari guánarügü, mebégiti ni cáta nun, adúgarügü náali ligía le uágubei loúnajana Búngiu láu ugúndani darí lúmoun lagúmujóun, lun nadímurejani ugánu buíti luágu línsiñejabu Búngiu.

²⁵ ‘Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúejan Búngiu. ²⁶ Ligía naríñagunbei jun ugúñe luágu masándiragun nan núngua láu dúru lueígiñe ni ában jídaangiñe, ²⁷ ladúga subúdigüda náali sun laráansejan Búngiu jun, marámuduntina ni cáta jueí. ²⁸ Toúnigigua jumá lubeíti júngua, toúnigi jumáñame afíñetiña ja líchugubaña Sífiri Sándu lun jóunigiruniña, ja tánigu lilígilisin Búngiu, ja lagáñijabaña láu líta Liraú guánarügü. ²⁹ Subúdi numúti luágu dánme lan nídín, jayábinba lan ámu áluga jagúnrinchaguni jafíñen, quei lebélurun geígusi jádoun mudún áfaraguaña. ³⁰ Níbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña afíñetiña. ³¹ Toúnigi jumá lubeíti, jarítagua jumeí luágu úrüwa lan irúmu náu ewéridijaün wéyuagu áriebu, ayájua buri áu.

³² ‘Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafíñen lúma lun líchugun ubaráü jun siélu jádan ja derégeguáañabaña jóungua lun. ³³ Mabúseerun nágili ni liseínsun ni ában, ni lanáangun, ³⁴ lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemegeirubei ja númabaña. ³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemegeirun, luágu gíñe lúnti lan larítawagún luágu dimúrei le laríñagubei Wabúreme Jesúsú dan le

laríñagunbei. “Gúndaatimáati le íchugubei sügú láu le erésibirubei.”

³⁶ Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súngebei. ³⁷ Ába jayájun súngebei láu igárigu, ába jóuburuni Páblo, ába jachúuruni. ³⁸ Jírutiñati ladúga laríñagun joun luágu maríjindügüya jamáali lánme. Ába jóudin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña afíñetiña, ába woúdin sügúlügü lídoun fulásu le gíribei Cos, larúgan, ában woúdin Ródas, ñigiñe Ródasgiñe woúdin lun Pátara. ² Ñi Pátara wadárira ában ugúnein teíbuga Fenícia, ába wádinun tídoun, ába woúdin. ³ Dan wásügürün, ába waríjini uboúju le Chípree, ába wígiruni lueígiñe wabaúna, ába wasígirun darí wachúlürün Síria. Queíti taráriguágüdúba lan ugúnein lídan ubúrgu le gíribei Tíro, ába warárirun ñi. ⁴ Áluaja wamútiña afíñetiña ja ñibaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jaríñagun lun lun mídin lan. ⁵ Dan lásügürün sédü wéyu ligía, ába woúdin. Sun afíñetiña jáu jámarigu jáma jasáanigu, ñúdüntiña íchaajawa chúlú bougudi lueí ubúrgu, ñi béyabu ába wájuduragun ayúmuragua lun Búngiu. ⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñoun.

⁷ Ába wagúmuchuni waweíyasun baránaja lúmagiñe ubúrugugiñe Tíro darí Tolemáida, le ñi lubei wabúsura joun afíñetiña, ába weréderun ában wéyu jáma ñi.

⁸ Larúgan, ába láfuridun Páblo wáma, wagía le lúmabei,

ába wachúlürün ubúругu Cesaréa. Ñi wouúdin lúbiñe Felípe le apúrichijabalin ugánu luáguti Jesucrístu, ába gíñe jádaangiñe sédü wügúriña já meja anúadajoubaña Jerusalén lun jeténirun lun le jemégeirubei affíñetiña, ába weréderun lúma. ⁹ Gasáaniguti Felípe gádürü würiña irájüñü ja máfuridungiña, ibíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachúlürün ában proféta Judéagiñe, gíriti Ágabo, ¹¹ liábiña aríjawa. Ába lanúgüni lubélitin Páblo, ába lagúraguni lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagúra-guni juríu labúreme bélitu le ubúругu Jerusalén, ábame jedéregeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén. ¹³ Ába laríñagun Páblo.

—¿Ca uágu jayájua, írudagüdána? Aráansetina má-marügü lun nagúrawagún Jerusalén, aráansetina darí lun nouñwen lueígiñe Nabúreme Jesúsu.

¹⁴ Quei siñá wamani larítangun agáñeira, ába wígiruni, ába waríñagun lun ladügúniwa lugúndan Búngiu.

¹⁵ Dan le gumújali webélujan ñi, ába waráanserun, ába wouúdin Jerusalén. ¹⁶ Ñúdútiña jádaangiñe affíñetiña wáma Cesaréagiñe, ñíñein ában Chíprena jádan, gíriti Mnasón, lújali lueígiñe lafiñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachúlürün Jerusalén, ába jerésibiruníwa affíñetiña láu ugúndani. ¹⁸ Larúgan, ába wouúdin lúma Páblo aríjei Jacóbo, ñíñanu gíñe sun tábutigu ligílisi

Jerusalén. ¹⁹ Ába labúsurun Páblo joun, ába labájüdaguni sun cátei le ladúgübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñagun lun Páblo.

—Wadúje, aríjabásan, añájein sarágu mílu juríu afíñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés. ²¹ Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madúgün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. ²² ¿Cábasan wadúga? Joúndaragubátia juríu dánme le jasúbudiruni luágu chülújadibu lan, lun jadúgün wuríbani bun. ²³ Niján cátei le lúnbei badúgüni. Añájein gádürü wügúriña ya wádan, gásu jagúnfulirun ában darádu lúma Búngiu. ²⁴ Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jadáradun, lárigiñeme gayáraajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdubu. ²⁵ Ánjeinti jawágu ja mámabaña juríu áni afíñejaña luágu Búngiu, abúrújaadiwa joun lun madíjeri jamá luágu buri cátei le, lúnrügu meígin jamá úwi le dagágüdawaali joun sándu, ni jítaü, ni anímaalu le tigíwarügüti, lun gíñe úa lan ni ában agámariduti wúri to mamárieiduntu lúma.

Járügüdüni Páblo adáüra tídan témpulu

²⁶ Ábati lanúgüniña Páblo gádürü wügüriña jagía, larúgan, ába larúmadaguagüdün lúngua jáma, ába lebélurun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáani jadágaragüdün cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába járügüdüni Páblo,
²⁸ ába jagúaragun.

—¡Wügüriña Israelítagu, íderagua jumáwa! Niján wügüri le eíbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgüdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladúga meja jaríjini Páblo ubúругu lúma Trófimo le Éfesona, jarítaguatíñati luágu barúlaani témpulurúgun.

³⁰ Ába jachágaragun sun lílana fulásu, ába jayábin gürígia eíbaagueina. Ábati járügüdüni Páblo, ába jadúruguduní boúgudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachúlürün ugánu lun gumándan luágu chagágujaña lan sun lílana ubúругu Jerusalén. ³² Ábati loúndaraguniña gumándan lisúdaaranigu jáma jábutigu, ába lachúlürün eíbaagueina le ñíjin jabeí gürígia. Dan jaríjini gumándan jáma súdaaragu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagúraguágüdüni láu bián güríngüri, lárigiñe, ába lálügüdajan cátei lan, lúma ca lan lidúnrunbei.

³⁴ Ámuñegueinarügüti cátei jaríñagun güriía, siñátiti gunfaráanda lan gumándan ni cáta ladúga ireíni le jadúgübei, ába lanúgagüdüni jábiñoun súaara. ³⁵ Dan le jachúlürünbei luágu testépute múna, ába janúgüni súaara Páblo oúyuajeina lueí jáfaruni güriía jilágubei, ³⁶ ladúga jayábiña súngubei járigi agúarajeina.

—¡Jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába laríñagun lun gumándan le jáubei súaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu? ³⁸ ¿Máma lubeí bugúya Ejíptona lé meja adúgübei ában mabúchajaü luágu ában dan, ába lanúgün gádürü mílu wügúriña gáfarajatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adúgabá fuleísei nun lun bígirunina lun nadímurejan joun güriía.

⁴⁰ Ába líchugun gumándan úma lun, ába laráramun Páblo luágu estépu, ába líchugun seíni láu lújabu joun güriía lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22

¹ —Nidújeñu jáma jagúbürigu, agáamba jumeí le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

³—Juríu áu, le gumúti, ubúruгу Társo loúbawagu Cilícia nagúriaжоúa, ya Jerusalén naweírida. Lábugiñe larúfudajan Gamáriel natúriaја, úarati larúfudajan lúma jalúrudun binádu wagúbüriгу. Jóuchatina súnwandan lun nesériwidun lun Búngiu táu sun nanígi, queígubeirügü ligáburi jadúgüni jugúya ugúñe wéyu. ⁴ Áu, eíbaaja numútiña meja lánigu Crístu darí náfaraguniña jilágubei, barúgua áu wügúriña furísunrugun. ⁵ Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Ñúdüntina ñi áluajaña affñetiña luágu Crístu lun nanúgüniña ñájoun lun nasúfuriragüdúniña.

Labájüdaguní Páblo luáguti lasáansiragun ligáburi

⁶ ‘Dan luáguñadina lubeí úma, yaráfaadina lun nachúlürün Damáscu, queíburi amídirugu, sódini ligía ladúnraagun ában oúnwenbun larúgounga siélugiñe náu, ⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?” ⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabei nun. ¹⁰ Ábati naríñagun. “¿Cábagi nadúga, Nabúreme?” Ába laríñagun nun. “Sarába, beíba luágu buweíyasun Damáscoun, ñíba laríñawagúa sun le lúnbei badúgüni bun.” ¹¹ Queíti maríjingüda láadina lubeí buga larúgounga ligíra, ába járügüdüni ja númabaña nújabu darí wachúlürün Damáscu.

¹² ‘Ñiñein ában wügúri Damáscu gíríti Ananías, gúnfuliti buídu lúma lilúrudun Moisés, sun juríu ja

aganoubaña Damáscu adímurejatiña buídu luágu wügúri ligía. ¹³ Ába liábin Ananías aríjana, dan lachúlürün, ába laráramun nubádu, ába laríñagun nun. “Nidúje Sáulo, ibíjayabeí baríjin lárigoún.” Lídan méme óra ligía, ába léfegechun nágu, ába naríjini. ¹⁴ Ábati laríñagun nun. “Anúadaja láadibu Jabúngiute binádu wagúbürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali, ¹⁵ ladúga bíchuguba lan fe luágu Jesúsu joun sun gürígia, abájüdaguabeíme le aríja báalibei lúma le agáamba báalibei. ¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachíbun bifígoun.”

Labájüdagun Páblo luágu loúnajóun apúrichija joun ja mámabaña juríu

¹⁷ Dan nagíribudun ubúrugun Jerusalén, luágu ában wéyu dan le nídin témpulurugu ayúmuragua, ába lasáliragun Nabúreme Jesúsu nun, ¹⁸ ába laríñagun nun. “Furíba yágiñe Jerusaléngiñe, oúfuda, ladúga madúgünbaña juríu gásu láu le baríñagunbei nuágu lídan fulásu le.” ¹⁹ Ábati naríñagun lun. “Nabúreme, subúdi jamúti luágu ñídü nán buri méja tídan sun jalígilisin afíñetiña anáajaña ja afíñebaña buágu furísunurugun, beí buri náña. ²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubárun janáangun ja áfarubalín.” ²¹ Ába laríñagun Nabúreme nun. “Beíba, ladúga nouñajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülú lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchati lun labágaridun!

²³ Queíti jasígirun agúaraja, achújoun buri janáangun, achúja calíqui íñun le jagáñi, ²⁴ ába laríñagun gumándan lun ladarúniwa Páblo jábiñoun súaara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara. ²⁵ Dan le gürágua jamáli lun jabeíchuni, ába laríñagun Páblo lun jábuti súaara le ñíbei.

—¿Garíchatünsan lun jabeíchun ában wügúri Rómana, magúserunga ligía?

²⁶ Dan le lagáambuni jábuti súaara cátei le, ába lídin aríñaga lun gumándan.

—Toúnigibátia láu le lúnbei badügüni, Rómanatia wügúri le.

²⁷ Ábati lídin gumándan luágun Páblo, ába laríñagun lun.

—¿Inárüni luágu Rómana ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeyitina sarágu seínsu lun Rómana nan.

Laríñaga Páblo.

—Ánjein áu, ñi nagúriajóúa.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómana lan Páblo, ába lanúfudedagun lueígiñe lagúraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güiringüri lueí, ába loúndaraguágüdüniña jábutigu fádirigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülú lúmoun wéyu le.

² Ábati loúnajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo. ³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdünina quei laríñaguni lúrudu, ¿cáti uágu bagáyuagüda nuágu, adúraaguei lúrudu?

⁴ Ába jaríñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladúga taríñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagúbürigu, áni jagúseragüdúñadina ladúga affíne nan luágu jásaaruba lan jiláaña lídaangiñe ouweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini. ⁸ Ladúga jaríñajare saduséogu luágu másaarunbaña lan jiláaña lídaangiñe ouweni, úatiña nege gíñe ánjeligu, ni espíritugu, ánjañati fariséogu, afñetiña luágu sun cátei le. ⁹ Jareínchati súnqubei, ába jásaarun jádaangiñe arúfudajatiña lilúrudun Moisés ja ñibaña, áni fariséogu gíñe jagía, ába jaríñagun.

—Wügúri le, úati ni cáta wuríbati ladúga, áni án-jeindügü ában lubeí espíritu adímurejabei lun o ában lan ánjeli, toúnigi wamátia lueí wadárirún oucha weréderuni luwádigimari Búngiu.

¹⁰ Weírjali sigénei darí lun lanúfudedun gumándan lueí jáfaruni Páblo jilágubei. Ábati louñajaniña lisúdaaranigu lun jaságaruni Páblo lídaangiñe adámurini lúnya janúgüni jábiñoun súdaara.

¹¹ Le ában árieibu, ába lasáliragun Wabúreme Jesúsu lun Páblo, ába laríñagun lun.

—Manúfudebá, Páblo, ladúga ítara quei rújadibu lan fe nuágu ya Jerusalén, bíchuguba gíñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni. ¹³ Joúgiñe bián-wein wügúriña ja aríñagubalin cátei le. ¹⁴ Ábati jouúdin jámoun jábutigu fádirigu lúma jámoun wügúriña weírígutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei. ¹⁵ Guetóti, jugúya

jáma ja jǫbiri lúrudugu íñutimaatiña amúriaja jumá lúma gumándan lun lanúgüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachúlürün.

¹⁶ Ába lachúlürün cátei le lábun lagáambun tiraú lítu Páblo, ába lídin jábiñoun súaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súaara, ába laríñagun lun.

—Barúbei irájü le lúmoun gumándan, níjein cátei lun laríñaguni lun.

¹⁸ Ába lanúgüni jábuti súaara lúmoun gumándan, ába laríñagun lun.

—Wáti adaürüti Páblo nun, ába lamúriajan núma lun nanúgüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanúgüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banúgüni Páblo jagíbugiñoun lúrudugu íñutimaatiña lún nege jálügüdünitima luágu lidúnrun. ²¹ Mafíñerabá joun, añájein jóugiñe bián-wein jawúgüriña arámudagu jabá úmada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügüñein bouñabagüle.

²² Ábati louñajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajoún Páblo lun gumádimati le Félix

²³ Ába lagúarun gumándan joun bián jádaangiñe jábutigu súdaara, ába laríñagun joun lun jaráanserun bián-san súdaara lun jóúdin Cesaréa eíbu, úara jáma úrúwa-weindiísi ja jawágutiña gabáyu, jáma bián-san ja táutiña efeín, lun jóúdin ladaúnrun néfu gúñoun. ²⁴ Aráansegüdáti gíñe gabáyu lun laweínjaniña Páblo, ru ligía dimúrei lun jachúlüragüdúni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun. ²⁷ Niján wügúri le, le nouñajabei bun, daújamaali yebe juríu áni jáfaraali yebe jilágubei, dan le nasúbudirúnbalin luágu Rómána lan, ába nídin jáu nisúdaaranigu, ába neséfuruni. ²⁸ Queíti nabúseerun nasúbudiruni ca lan lidúnrunbei jarúma, ába nanúgüni jagíbugiñoun lúrudugu juríu íñutimaatiña. ²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürún. ³⁰ Quei lachúlürün lábun nagáambun luágu jaráansejaña lan juríu lun jáfaruni jilágubei, ligía lébubei nouñajani bun madárasajaanga. Aríñagaadina gíñe joun ja íchugubaña lidúnrun lun búma lan jaráanserei le jánibei lúma.”

³¹ Ábati janúgüni súdaara Páblo quei laríñawagúniwa joun, árieibu, chülú Antípatris. ³² Larúgan, ligía jagíribudun súdaara ja eíbubaña, súdaara ja jawágubaña gabáyu, ába jasígiruni jaweíyasun láu Páblo. ³³ Dan le jachúlürünbei Cesaréa, ába jederegerunun gárada lun gumádimati, derége jameí gíñe Páblo. ³⁴ Láriñe lalíjanun gumádimati gárada, ába lálügüdajan jaliana

lan Páblo, dánti le lasúbudirúnbalin luágu Cilíciana lan,
³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachúlürün Ananías, fádiri le íñutimaabei, ubúrugun Cesaréa jáu wügúriña jádaangiñe juríu weírigutiña, lúma ában wügúri le subúdijabuti lun lúrudu, gíriri Tértulo. Ába jayábin lúmoun gumádimati lun jíchugun lidúnrun Páblo. ² Dan le lanügúniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágu bareíni, gumádimati, lújadiwa láu darángilaü ya wageíra, buíti leíbugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teínqui wamútibu luágu. ⁴ Lun magídarun wamáni bidáani sarágu, amúriajatina búma lun badúgün murúsun fuleísei woun lun bagáambuníwa luágu murúsun óra. ⁵ Niján wügúri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichúgüdinabei jadámurin nazarénugu. ⁶ Álugati gíñe lawíyedagüdünun témpulu ligíbugiñe Búngiu láu lebélaagüdün ában wügúri le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburi walúrudun, ⁷ ába leméterun gumándan Lísias ñíjin, ába lagídaruni waweí láu érei, ⁸ ába laríñagun luágu ja lan íchugubaña lidúnrun lúnti lan

jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le waríñagubei luágu.

⁹Juríu buri ja ñíbaña, aríñagatiña gíñe luágu inárüni lan sun le laríñagubei Tértulo. ¹⁰Ába ladúgün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladúga subúdi náani luágu lúmagiñe lan sarágu irúmu bagúseragüdajan lídan fulásu le. ¹¹Gayáraati bálügüdajan ánjein inárüni lubeí le lúnbei naríñaguni bun. Dúusurügügili wéyu lueígiñe nachúlürün ubúrugun Jerusalén lun nájuduragun lun Búngiu, ¹²madárirúnwatina asígeneja ni ca úma, ni achágaraguágüdaña gürígia témpulurugu, ni tídan buri tíbiri jalígilisin juríu, ni lídan buri ámu fulásu ubúrugú. ¹³Gürígia ja, siñáti jarúfuduni luágu inárüni lan ni ában lídaangiñe sun cátei le jaríñagubei nuágu. ¹⁴Ában cátei naríñagubei bun, luágu nesériwiduña lan lun Jabúngiute nagúbürigu quei larúfudajani Jesucrístu, le uágubei jaríñaga luágu marícha lan. Afíñetina luágu sun le bürúwañubei tídan buri líburu to lánina lilúrudun Moisés lúma lé meja jabúrújabei profétagu. ¹⁵Níjein gíñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja wuríbabaña. ¹⁶Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürígia.

¹⁷Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdün lun Búngiu. ¹⁸Nadúgüñein yebe cátei le témpulurugu lá-rigiñe narúmudaguagüdün núngua quei le igáburi, ligía

jadárirunina átiri juríu loúbawaguna Ásia ñi témpuluru, úatiña sarágu gürígia ñi, ni chagáguauí. ¹⁹ Jagía lúnbaña jayábin arúfudagua jóungua ya lun jaríñaguni le lúnbei jaríñaguni ánjein níjein lubeí lúnti jaríñaguni nuágu, ²⁰ jaríñaguni lan ja yábaña ánjein darí jabei nidúnrun dan le ligíbugiñe nubeí líñun-ágei lúruđu juríu. ²¹ Siñáti jaríñagun ni cáta nuágu, lueídügüya luágu lan ában wéyu dan le jádaañadina lubeí, ába nagúaragun aríñaga. “Jagúseragüdüñadina ugüñe lueígiñe afíñe nan luágu jásaaruba lan jiláaña lídaangiñe ouweni lúnya jabágaridun.”

²² Subúsiti sarágu luágu larúfudajan Jesúsu lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachúlürün gumándan Lisías.

²³ Ábati laríñagun Félix lun jábuti súdaara lun lasígirun Páblo daúwañu, lun furáangu lan lun gayára lan jóúdin lumádagu aríjei, eténira lun.

²⁴ Átiri wéyu lárigiñe, ábaya lachúlürün Félix túma Drusíla to lúmari, to juríu, ubúrugun Cesaréa, ába lagúaragüdüni luágu Páblo lun ladímurejan lun luágu Jesucrístu. ²⁵ Dan le ladímurejaanbei Páblo lun luágu ibágari le surúbei, lúma luágu ágüdaagúni únguaí lueí le wuríbabei, lúma luáguti wéyu le lúnbei lagúseragüdüniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáni nan, nagúarayaba bun.

²⁶ Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubeí wájali luágu lun layánujan lúma. ²⁷ Sügúti bián irúmu ítara, ábati lagúmuchun lagúmadijan Félix, ába lárügüdüni Pórcio

Fésto lufúlasun. Queíti busén lan Félix leréderun buídu jáma juríu, ába lígiruni Páblo daúwañu.

25

Páblo ligíbugiñe Fésto

¹ Ábati lachúlürün Fésto lun lárügüdüní lufúlasun queísi gumádimati, úrüwa wéyu lueígiñe, ába lamúdeirun Cesaréagiñe lun ubúrugun Jerusalén. ² Ába jachúlürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Fésto. ³ Ába jamúriajan fuleísei lúma lun loúnajan anúgei Páblo Jerusalén. Le jaráansejanbei, lún yebe jáfaruni jilágubei luágu úma. ⁴ Ába loúnabun Fésto luágu Cesaréa lan ladaürúwa Páblo, áni jarítagua lan lídin ñi madíse. ⁵ Ába laríñagun joun.

—Ligía lúnti lubeí joúdin ja weírigutimaabaña jí-daangiñe Cesaréa úara núma, áni ánjein adúgaali lubeí wügúri ligía dúru, gayáraabei jaríñaguni.

⁶ Wídü rügúñein o díisi lan wéyu láu Fésto Jerusalén, ába lagíribudun ubúrugun Cesaréa. Larúgan, ába lárügüdüní lufúlasun lun lagúseragüdün, ába loúnajan luágu Páblo. ⁷ Dan le lebélurunbei Páblo, ába jagúriridágun juríu ja ñúbinbaña Jerusaléngiñe láu, ába jíchugun sarágu lidúnrun le júrüti, áni siñáti jarúfuduni luágu inárüni lan ni cáta lídaangiñe le jaríñagunbei. ⁸ Ábati laríñagun Páblo lídan ladímurejan lueígiñegua.

—Madúgüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰ Ába louñabun Páblo.

—Ligíbugiñeñadina lagúseragüle urúei César, le ñí lubei lúnti lan nagúserún. Queísi basúbudiruni buídu, madúgüngidina dúru joun juríu. ¹¹ Ánjein adúgaadina lubei dúru le garíchatí lun nafarún jilágubei lueígiñe, mebéresegúntina noúnwen, ánjein úa lubei ni cáta lánina inárúni lídan sun le aríñawagúbei nuágu, úati ni ában garíchatí lun ledéregerunina joun juríu. Amúriajatina lun César lan agúseragüdána.

¹² Lárigiñeti layánujan Fésto jáma lánigu cába lan ladúga láu Páblo, ába laríñagun lun.

—Amúriajaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴ Quei reídei jabeí átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügúri lígirun Félix dáüwañu ya. ¹⁵ Dan le Jerusalén nubeí, rútiña jábutigu fádirigu jáma wügúriña juríu weírigutiña lidúnrun nigíbugiñe, amúriajatiña núma lun nasíadiruni. ¹⁶ Ába naríñagun joun luágu magáburi láani lúruđu Rómana lun lasíadirun ában güriña lun ouweni maríjinga láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷ Ligía, lídan lubei le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába noúnajan luágu wügúri ligía. ¹⁸ Ja ñúbinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítagua. ¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafíñen, lúma

luágu ában nege wügúri gíríti Jesúsu —jiláti nege, lariñajare Páblo luágu wínwanya lán nege. ²⁰ Queíti ibídiñe lan nun cába lan nadúga lídan ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñi. ²¹ Quei lamúriajan lun urúeiba lan Augústo César agúseragüdei, ába naríñagun lun lasígirun dáüwañu daríme gayára lan noúnajani lun Augústo César.

²² Ábati lariñagun Agrípa lun Fésto.

—Buséntina gíñe nagáambuni wügúri ligía.

Ába lariñagun Fésto lun.

—Bagáambubei jarúga.

²³ Larúgan, dan le jachúlürünbei Agrípa túma Bereníce, ába jebélurun láu oúnwenbun uweíríguni múnadoun, jáma jábutigu súdaara jáma wügúriña weírígutiña ñi ubúругu. Ába loúnajan Fésto luágu Páblo, ²⁴ ába lariñagun.

—Urúei Agrípa, jáma wügúriña ja adámurigubaña wáma ya, niján wügúri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loúnwen. ²⁵ Laganoún nun camá madúgüngili ni cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdei, noúnajaali lun. ²⁶ Queíti úa lan cába lan cátei uágu nabúrúja lun Augústo luágu wügúri le, ligía nanúgübalin jigíbugiñoún, bigíbugiñoúntimá urúei Agrípa, lun bálügüdaguni, níjein lámuga cába lan nabúrúja. ²⁷ Ladúga garábaguati nun lun noúnajan ában adaürúti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

² —Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalibei juríu nuágu, ³ gúndaatimáatina ladúga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúrugu Jerusalén, lúmagiñe irájügídina. ⁵ Lúja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lídan luwúyeri wafíñen, wagía juríu. ⁶ Guetóti, jagúseragüdúñadina luágu eménigini le nuágubei, luágu lásaaragüdübaña lan Búngiu jiláaña lídaangiñe ouweni lúnya jabágaridun, queí meja laríñaguni joun binádu wagúbürigu. ⁷ Dúusugubei família le jadúgawagunbei lirájüñü Israél agúrabatiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárra juríu nidúnrun, urúei Agrípa. ⁸ ¿Mafíñetün funági luágu gayára lan lásaaragüdüniña Búngiu jiláaña?

Labájüdagun Páblo luágu meja leíbaajaniña afíñetiña

⁹ ‘Nugúya guánarügü, jarítaguatina méja luágu lúnti lan neíbaajaniña ja afálarunbalín Jesúsu Nazarétna, ¹⁰ áni

ítara líña nadúgüni ubúругu Jerusalén. Láu ubáfu le jíhugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasíadirúniwa lun jóunwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adáagua numúti meja cátei le tídan sun jalígilisin afíñetiña, áni weíriti meja nigáñi joun darí lun neíbaajaniña chülú lídoun buri ubúругu le díseti.

Labájüdagunya Páblo luágu lasálbarun

¹² ‘Ligía yebe cátei le gabúgürübalina ubúrugun Damáscó ában dan, jóunajan jábutigu fádirigu. ¹³ Luágu úma, nurúeite, amídirigu, ába naríjin ában larúgounga siélugiñeti, jéreti sügú lau larúgounga wéyu, ába ladúnraagun geyégua náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladúga bágasu dan le líchaagun quíqui luágun cátei gágiriti.” ¹⁵ Ábati naríñagun. “¿Cátabusan, Nabúreme?” Ába lariñagun nun. “Jesúsu áu, le guánarügü beíbaajabei. ¹⁶ Sarába, ráramabá, ladúga narúfudagunbei núngua bun lun besériwidun nun, lun geféen ban luágu le aríja báalibei guetó lúma le lúnbei narúfuduni bun. ¹⁷ Neséfurubadibu jaweí juríu lúma jaweí ja mámabaña juríu, ja únbaña noúnajabu guetó. ¹⁸ Noúnajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Noúnajañadibu joun, afíñe

jamámuga nuágu, ferúdunawa lámuga jafígoun, ibíja jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

¹⁹ ‘Ítara líña lubeíti, urúei Agrípa, ába nadúgüni le laríñagunbei Jesúsu nun lídan le lasálriragunbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagíribudun lun Búngiu, lun jadúgün cátei buíti, arijúa lámuga luágu sáansiguaali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei járügüdünina juríu tém-pulurugu, ába jálugun jáfarunina jilágubei. ²² Ába líder-angunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírígubaña queisi ja únabugubaña, chülú lúmoun óra le. Maríñaguntina ni cáta joun gürígia bougudin lueí le uágubei jaríñaga Moisés jáma profétagu luágu lasúsere-duba lan— ²³ luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu ibágari magúmuchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafíñeragüdüni Agrípa luágu Jesucrístu

²⁴ Lídan le laríñagunbalin Páblo cátei le buri lídan ladímurejan lueígiñegua, ába lagúaragun Fésto.

—¡Lúlüjaali báu, Páblo! Lúlügüdá sarágu atúriajani báu.

²⁵ Ába loúnabun Páblo, ába laríñagun.

—Málülünti náu, gumádimati, inárüni le naríñagun-bei. ²⁶ Niján urúei Agrípa le subúdíjabúbei lún buri cátei le buídu, ligía gayára lubeí nadímurejan ligíbugiñe,

furáangu, ladúga choúru náni luágu subúdi láani gíñe sun cátei le asúseredubei lun Jesúsu, ladúga máma cátei le adügúti arámudaguarügü. ²⁷ ¿Afíñetibu luágu le jaríñagubei profétagu, urúei Agrípa? Subúdi numúti luágu afíñe ban.

²⁸ Ába laríñagun Agrípa lun.

—¿Jarítaguatibusan luágu bafíñeragüdúbadina lan luágu Jesucrístu ítara ufúresen?

²⁹ —Furése yébe, o darása yébe, amúriajatina lúma Búngiu, mámarügü buágu, jawágu gíñe sun ja añájabaña agáambana ugúñe, lun jayábin lun jafíñerun quei nugúya, úouga güríngüri jawágu.

³⁰ Lárigiñe laríñaguni Páblo cátei le, ába lásaarun urúei, sará gíñe gumádimati úara túma Bereníce jáma sun ja núnbaña ñi, ³¹ ába jadíñurun ñígiñe lun jadímurejan luágu cátei le. Jaríñagatí buri jámagua.

—Wügúri le, madúgünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügúri le lun lagúser-agüdüni Augústo César, gayáraati jamúga lígirawagüdún.

27

Loúnajóun Páblo ubúrugun Róma

¹ Lídan le jaráanserunbei lun jóunajaniwa Itálioun, ába ledéregerún Páblo jáma ja jíbiri adaürútiña lábu laríjin ában súdeara gíríti Júlio, ligía gumándanbei lun jadámurin súdeara le gíríbei “lisúdearanigu Urúei Augústo.”

² Ába wádinagun tídoun ában ugúnein nűbintu Adramítigiñe lun Ásioun. Níñein gíñe Aristárco wáma, le Tesalónica, Tesalónica ában ubúругu láni Macedónia.

³ Larúgan, ligía wachúlürün Sidón, lídan fulásu ligía, buíti loúseruni Júlio, le gumándan, Páblo, ígira lumúti lun bisída láníña lumádagu lúma lun jeténirun lun. ⁴ Lídan wáfuridun Sidóngiñe, ába woúdin únabugiñe libíti uboúju Chípree ladúga wabánrouñein lan garábali. ⁵ Ába wájiñuraguni barána ligíbugiñe lubéyaari Cilfcia lúma Panfília, ába wachúlürün lídoun fulásu le gírabei Míra, ában ubúругu lání Lícia.

⁶ Ñi ladárira gumándan ában ugúnein Alejandríana teíbuga Itália, ába ládinagüdúniwa lun wasígiruni waweíyasun. ⁷ Áfayajatiwa jámaru luágu sarágu wéyu, láu lénreengun wachúlüra ligíbugiñe ubúругu le gírabei Gnído. Queíti wabánroun mémegili lubeí garábali, ába wáfayajan únabugiñe libíti uboúju Créta, sügüína wagía ligíbugiñe Salmón, ⁸ wasígira láu méme lénreengun láru láru, ába wachúlürün lídoun ában ubúругu gíríti Buíti Fulásu, yaráfa lun ubúругu Laséa.

⁹ Féridjadiwa sarágu dan, dénehajaliti áfayajani baránaja ladúga yaráfaali lidáni luríbouga, sügújali jafédun jurú le lánina ferúdun figoú. Ligía lewéridirunbaliña Páblo, laríñaga joun.

¹⁰ —Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

¹¹ Lubáragiñe ladúgün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei. ¹² Queíti mabuídun lubeí fulásu ligía lun lásügürün luríba dan ñi, ába jarítangun jíbe-ágei luágu buídutima lán yebe lun wáfuridun nígiñe, lun waríjin ánjein gayára wachúlürün Feníce, ában fulásu lání uboúju

Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta. ¹⁴ Málüti lueígiñe jáfayarun, ába láfurun ában nodísi jéreti, ¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanúgüniwa. ¹⁶ Ába wásügürün únabugiñe libíti ában liraúraü uboúju gíríti Cláuda, le ñí lubei mére lan láfujan garábali, ába wádinagüdünnun tisálufun wagúne to atoújeina waboún, láu ában lénreengun. ¹⁷ Lárigiñe wiñúrunun ugúneirugun, ába lásügüragüdüniwa gúrudu tábugiñegiñe ugúnein lun jagúragunun, derébugu támuga. Queíti janúfudebei lueí jóudin adágara luágu sándala le gírabei Síрте, ába jagídara-guní bíra, ába jígiraguagüdünnun jóungua lun lanúgüniwa garábali. ¹⁸ Larúgan, quei jére mémegili lubeí dan, ába jagúmeserun achágajei tíla ugúnein baránajoún, ¹⁹ luágu lúruwan wéyu, ába jachágajani lídaangiñe tumégegungugúnein baránajoún láu jájabu guánarügü. ²⁰ Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wafíñen luágu weséfuruba lan.

²¹ Queíti sügújadiwa lubeí sarágu dan meíginga, ába laráramun Páblo wádan, ába laríñagan.

—Wügúriña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dáñu le, áni féridi wameí wálagu. ²² Gagúraasun jumá, úabei ni ában jídaangiñe oúweti, láu sun teféridiruba lan ugúnein. ²³ Chülújali ában láni Búngiu ánjeli númoun

áriebu to, loúnagüle Búngiu le Nabúreme le gíñe únbei nesériwida, ²⁴ laríñajare ánjeli ligía nun. “Manúfuded-abá, Páblo, ladúga barúfudaguba búngua ligíbugiñe urúei César Augústo, áni badúgaba leséfuraña Búngiu sun ja tídaanbaña ugúnein búma lueí ouweni.” ²⁵ Gagúraasun jumá lubéfti, ladúga jeménigitina luágu Búngiu, áni choúru numúti luágu ítara lúba lan quei laríñaguni án-jeli luágu nun, ²⁶ láu sun, wadágaruba lan luágun ában uboúju.

²⁷ Bián dimáasu wáu luágu waweíyasun, lubáranarugúñadiwa Ádria, labánreinja mémeñadiwa garábali, ligía, amídi áriebu, ába jasándirun mádulungu luágu achúlüreina wáña lan luágun múa. ²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguouún mémeraüi, gádürü-wein-díisi ugúdi. ²⁹ Léti janúfude lueí jabúguchun luágu dúbü, ába jágurun gádürü ounguru tiyúnagiñe ugúnein, ába jagúrabajan larúgadun láu idíjeri. ³⁰ Súnti dan le, añája mádulungu asáminara lun jeséfuragun joúngua láu jeíbaagun tídaangiñe ugúnein, ába jagúmeserun aráriragüdoún salúfu dúnarugun, jadúga camá jágura ounguru tígirigiñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jesé-furun.

³² Ábati jíbuguni súdeara tugúrudun salúfu, ába jígi-ragüdünun dúnarugun.

³³ Lubá larúgan, ába laríñagun Páblo joun súngubei lun jeígin, laríñaga joun.

—Bián dimáasu guetó lueígiñe marúmugun jumá buídu, meígin sarágu, ladúga idíjeri le juágubei.

³⁴ Ayúmuraguatina jun lun jeígin, líchuguba érei jun

lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanúgün ában fein lújaburugu, ába líchugun eteíngiruni lun Búngiu jagíbugiñe súngebei. Ábati lagúbachagunun, ába leígin. ³⁶ Ába járügüdün ja jíbiri gurásu, ába gíñe jeígin. ³⁷ Biánsáñadiwa úrüwa-wein-díisi-sísi gürígia tídan ugúnein. ³⁸ Dánti le jóujúaña quimúle, ába jáguruni türígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ñí jabei mádulungu joun, ába jaríjin ában beídi gebéyaariti, ába jóúchun lun janúgünun ugúnein ñíjin. ⁴⁰ Ába jíbuguni lagúruga óunguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüni lúgubu bíra, ába tagúmeserun ugúnein ayarafajoua lun láru béya. ⁴¹ Ába tídin lídoun ában fulásu le ñí lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun aboúchagua tiyúnagiñe, le lére lugúdi barána. ⁴² Ába yebe jabúseerun súdeara jáfaraguniña adaürútiña jilágubei lueí janúrajan áfulijeina. ⁴³ Ánjein le gumándan, quei busén lubei leséfuruni Páblo, mígirunti lun jadúgüni súdeara le jarítagebei. Ábati laríñagun lun lan jachúbaragun ja gáfulijadíbaña baránajoun furúmiñe lun jachúlürün múarugun, ⁴⁴ jáme jíbiri, jóúdinme ligíbuagu buri fuláansu lúma buri tífe ugúnein. Ítara líña jachúlürün súngebei múarugun séfuñu.

¹ Dan le séfujadiwa sun wagía láru béya, ligía wasúbudiruni luágu Málta lan líribei uboúju ligía. ² Buíti jóuseruniwa gürígia ja aganoúbaña ñi, ába jáfuragun ában oúnwenbun wátu quei dilíga lubeí áni niján júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúrajaña lueí lára wátu, ába tárügüdün luágu lújabu, ába tágürüni. ⁴ Dan le jaríjinbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügúri gáfarajati wügúri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúsere-dunti ni cáta lun. ⁶ Agúrabatiñá yebe súngubei láludun lújabu, o láburujan lan oúwe. Lílúwagu jagúrabajan, dan le jaríjinbei luágu masúsere-dun lan ni cáta lun, ába lasáansirun jarítangun, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñíñein lufúlasun ában wügúri le weírigutimaabei lídan sun uboúju ligía, Públío líribei, resíbi lumútiwa lúbiñe, seríwi láwa buídu luágu úrüwa wéyu. ⁸ Roun liñáti lúguchi Públío láu sándi, abíruaü, lúma denési. Ába lídin Páblo aríjei, lásun layúmuragun lun Búngiu luágu, ába líchuguni lújabu luágu, ába lareídagun. ⁹ Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídagun. ¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachúlürün dan lúnnya wádinagun lun wasígiruni waweíyasun, ába jíchuguni sun le wemegeirubei woun lun waweíyasun.

Lachúlürün Páblo ubúrugun Róma

¹¹ Lárigiñe úrüwa játi wáu luágu uboúju ligía, ába wádinagun tídoun ában ugúnein to eréderuboun ásügürei luríbouga ñi luágu uboúju ligía. Alejandríana ugúnein tugúya, ñíñanu jayáwa bián sáandu luágu tigíbu ugúnein tugúya, Cástor lúma Pólux. ¹² Ába wachúlürün ubúругu Siracúsa, ába weréderun úrüwa wéyu ñi, ¹³ ñígiñe wasí-gira láru láru darí wachúlürün ubúругu Régio. Larúgan, ába láfujan suédi, luágu libíaman wéyu ába wachúlürün lídoun liraúraü aúdü le gíríbei Puteóli. ¹⁴ Ñi wadárira átiri afíñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrugun Róma. ¹⁵ Agáambaña afíñetiña ja Rómabaña wawágu luágu awánte lan, ába jóudin wabároun, jíbiri chúlú lúmoun fulásu le gíríbei Fóro, le luágubei úma gíríti Ápio, jíbiri, dúnguatiña wáma lídan fulásu le gíríbei Úrüwa Jában Chúlúdügütiña. Dan le laríjinbaliña Páblo, ába líchugun eteíngiruni lun Búngiu, ába lárügüdün gurásu. ¹⁶ Dan le wachúlürünbei Róma, ába ledéregeruniña gumándan adaürútiña lun jábuti ónigirutiña, ánjeinti Páblo, ígira lumúti lun leréderun lábugua láu ában súdaara ónigirei.

Lapúrichijan Páblo Róma

¹⁷ Úrüwa wéyu lárigiñe lachúlürün Páblo, ába loúnajan jawágu juríu weírigutiña ja Rómabaña, dan le adámuriguaaña, ába laríñagun joun.

—Nidújeñu, láu sun madúgün nan ni cáta wuríbati joun juríu, ni lun le uágubei jéchuda binádu wagúbürigu, derégawatina dáüwañu joun Rómana ubúругu Jerusalén.

¹⁸ Lárigiñe jálugüdagúnina, álugatiñá yebe jígiragüdüina ladúga madári jamá nidúnrun le lúnti náfarúniwa jilágubei lueígiñe, ¹⁹ májatiña jurú lun nígirawagüdüin, ába namúriajan lun urúeiba lan César agúseragüdána, láu sun madúnrun jamá ninásiñun nun. ²⁰ Ligía lubeíti lébubei noúnajan juágu lun naríjinün lúma lun nadímurejan jun, ladúga lueígiñe cátei le uágubei weménigida wagía Israelítagu anája lubeí gürágu láu güringüri le.

²¹ Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili gíñe ni ában wapaísanu jádaangiñe ja núbinbaña nígiñe aríñaguti wuríbati woun buágu.

²² Busétiwa jamúga wagáambuni ca lan barítagubei, ladúga subúdi wamúti luágu adímurejoúa lan wuríba luágu iséri adámurini le, le lánina lémeri Jesúsu, lídan sun fulásu.

²³ Ábati jíridun ában wéyu lun, ába jachúlürün sarágu güriñe le ní lubei lagánawa Páblo. Ába ladímurejan joun lúmagiñe bináfin darí guñoun luágu larúeijan Búngiu. Louchun lun lafíñeragüdüniña luágu Jesúsu lan asálbaragüleibe le jagúrabajabei láu layúsuruni lilúrudun Moisés lúma le jabúrújabei profétagu. ²⁴ Jíbiri, affíñetiña luágu le laríñagubei Páblo, jíbiri maffíñetiña. ²⁵ Queíti múradun jamá jámagua luágu jarítangun, ába jagúmeserun ñúdüngua, ábati laríñagun Páblo joun.

—Ligía laríñagunbei Sífiri Sándu joun binádu wagúbürigu lídaangiñe proféta Isaías.

²⁶ Beíba, baríñagame joun güriñe ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dimúrei le jagáambubei.

Jaríjuba sarágu cátei, meféenbadün luágu,

²⁷ ladúga deréeru janígi gürígia ja, áni wuríbatí jagáambun,
darú jamutí jágu, lueí jaríjini laníchigu cátei le jaríjubei,
úati gíñe gunfaráanda jamáni cátei le jagáambubei,
derétu gíñe janígi,
máluajan jamútina lun nareídaguagüdünun jawáni.

²⁸ Subúdi jumeí luágu oúnaja láali lan Búngiu ugánu luáguti Jesúsu le méme Wasálbaragülebei joun ja mámabaña juríu, áni jagía, jánjaruba lun.

²⁹ Dan le laríñagunbei Páblo ítara, ába jóúdingua juríu, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajoútu, resíbi lumútiña sun ja ñúdümbaña aríjei.

³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucrístu, mebérésejanga ni ában lun.

Lerérún Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
